

清

史

稿

清史稿

本紀八

聖祖本紀三

四十一年壬午春正月壬寅詔修國子監丙午詔繫囚經緩決者減一等以雅爾江阿襲封簡親王庚戌上巡幸五臺山二月庚申次射虎川士民請於菩薩頂建萬壽亭祝釐不許丁卯上巡視子牙河三月壬午上還京以瓦爾岱爲滿洲都統吳達禪馬思哈滿不爲蒙古都統丁亥上御經筵夏四月甲戌賜致仕大學士王熙御書匾對傳旨曰卿先朝舊臣其強餐食慎醫藥以慰朕念五月癸巳定發配人犯歸籍僉遣流犯死配所妻子許還鄉里辛丑顯親王丹臻薨遣皇子及大臣治喪賜銀萬兩諡曰密子衍璜襲壬寅先是廉州府連山瑤人作亂御史叅奏命都統嵩祝率禁旅會討並命尙書范承勳勘狀至是嵩祝奏官兵一到瑤人乞降先後投出瑤人一萬九千餘名獻出戕官黎貴等九人即於軍前正法降瑤安插交總督料理范承勳奏瑤人滋事副將杜芳傷死總兵劉虎先行退回應擬斬提督殷化行應革職得旨殷化行有戰功改原品致仕

劉虎免死丙午召廷臣至保和殿頒賜御書六月壬子貴州葛彝寨苗人爲亂官軍討平之戊午上製訓飭士子文頒發直省勒石學宮乙未上奉皇太后幸熱河乙丑四川提督岳昇龍疏報大涼山獠目馬比必率衆內附請授土千戶給印信閏六月辛丑木鴉番民萬九千餘戶內附請置安撫使副使土百戶等職均從之八月庚辰朔增順天浙江湖廣鄉試中額戊申上奉皇太后還宮九月辛亥以李正宗盧崇耀馮國相爲漢軍都統壬子定五經中式例癸丑停本年秋決辛酉以齊世嵩祝爲滿洲都統莽喀爲漢軍都統車納福爲蒙古都統甲子詔南巡閱河所過停供張禁科斂官吏無相餽遺百姓各守本業督撫布告使明知朕意己巳以席哈納爲大學士敦拜爲吏部尙書席爾達爲禮部尙書溫達爲左都御史管源忠爲廣州將軍鎮筮諸生李豐等叩閣言紅苗殺人宥司不問詔侍郎傅繼祖甘國樞巡撫趙申喬馳驛按問癸酉上南巡啟鑾冬十月壬午次德州皇太子胤祔有疾上迴鑾癸卯上還宮丙午以郭世隆爲廣東廣西總督金世榮爲浙江福建總督十一月丙辰詔免陝西安徽明年額賦

甲子大學士伊桑阿乞休命致仕壬申廣西巡撫蕭永藻疏劾布政使教化新虧空倉穀應令賠補上曰米穀必有收貯之地乃可經久若無倉廩積於空野難免朽爛況南方卑溼之地乎其別定例以聞命修禹陵十二月壬辰廷臣以明年五旬萬壽請上尊號上不許戶部議駁奉天報災上曰晴雨原無一定始者雨水調和其後被災亦常事耳可准其奏乙未改趙申喬爲偏沅巡撫以趙宏燦爲廣東提督王世臣爲浙江提督孫徵顯爲漢軍都統壬寅厄魯特丹津阿拉布坦來朝厚賚之封爲郡王賜地遊牧是歲免江南河南浙江湖廣甘肅等省十州縣災賦有差朝鮮琉球入貢

四十二年癸未春正月壬子大學士諸臣賀祝五旬萬壽恭進萬壽無疆屏御之收其寫冊壬戌上南巡閱河丁卯以兪益謨爲湖廣提督庚午次濟南觀珍珠泉賦三渡齊河詩壬申次泰安登泰山詔免蹕路所經及歉收各屬去年逋賦二月丁丑運漕米四萬石賑濟甯泰安閱宿遷堤工己卯自桃源登舟徧閱河隄甲申渡江登金山丙戌次蘇州遣官奠大學士宋德宜墓庚寅上駐杭州

閱射辛丑次江甯三月戊申上閱高家堰翟家壩隄工己酉上閱黃河南龍窩烟墩等隄庚申上還京癸亥萬壽節上朝皇太后宮免廷臣朝賀頒恩詔錫高年獨額賦察孝義恤困窮舉遺逸罪非常赦所不原者咸赦除之頒賜親王郡王以下文武百官有差庚午以洞鄂襲封信郡王辛未上御經筵賜內廷修書舉人汪灝何焯蔣廷錫進士一體殿試夏四月辛巳賜王式丹等一百六十三人進士及第出身有差四川威州龍溪十八寨生番歸化納糧丁亥大學士熊賜履乞休命解官食俸留備顧問傅繼祖等察審湖廣紅苗搶掠一案得旨總督郭琇提督杜本植隱匿不報均革職巡撫金璽降官以喻成龍爲湖廣總督癸巳致仕大學士王熙卒予祭葬諡文靖丙申以陳廷敬爲大學士兼吏部尙書戊戌詔原任侍郎任克溥年逾九十洵爲耆碩加尙書銜以李光地爲吏部尙書仍巡撫直隸以莽喀爲荊州將軍諾羅布爲杭州將軍宗室愛音圖爲漢軍都統孫渣齊翁俄里爲蒙古都統己亥諭八旗人等朕不惜數百萬帑金爲旗丁償通贖地籌畫生計爾等能人人以孝弟爲心勤儉爲事則足仰慰朕心

矣倘不知愛惜仍前游蕩飲博必以嚴法處之親書宣諭其尙欽遵五月壬子裕親王福全有疾上連日視之癸亥內大臣索額圖有罪拘禁於宗人府己巳上巡幸塞外六月辛巳恭親王常寧薨命皇子每日齊集賜銀一萬兩遣官造墳立碑壬寅裕親王福全薨上聞之兼程迴京秋七月乙巳朔上臨裕親王喪哭之慟自蒼震門入居景仁宮王大臣請還乾清宮上曰居便殿乃祇遵成憲也居五日命皇長子等持服命御史羅占造墳建碑諡曰憲子保泰嗣爵戊申以山東大雨遣官分賑庚戌上巡幸塞外己巳發帑金三十萬兩截漕五十萬石賑山東山東有司不理荒政停其升轉八月癸巳停本年秋審九月壬子子故侍郎高士奇勳杜訥祭葬己巳命尙書席爾達督辦紅苗冬十月癸未上西巡啓鑾命給事中滿普御史顧素在後行查僕從生事卽時鎖拿庚寅喇麻請廣洮州衛廟上曰取民地以廣廟宇有碍民生其永行禁止癸巳過井陘次柏井驛驛向乏泉至是非泉湧溢丁酉駐太原戊戌詔免山西通賦百姓集行宮前顛留車駕上爲再停一日十一月乙巳上次洪洞遣官祭女媧陵壬子渡黃

河次潼關遣官祭西嶽賜迎駕百歲老人白金甲寅次渭南閱固原標兵射賜提督潘育龍以下加一級內辰上駐西安丁巳閱駐防官兵射遣官祭周文王武王祭文書御名遣官奠提督張勇梁化鳳墓己未上大閱於西安賜將軍博濟御用弓矢賜官兵宴軍民集行宮前籲留上爲留一日賜盤屋徵士李頤御書操志清潔匾額免陝甘通賦癸亥上迴鑾己巳次陝州命皇三子胤祉往閱三門底柱十二月乙亥上次修武閱懷慶營伍不整逮總兵官王應統入京論死庚辰次磁州御書賢哲遺休額懸先賢子貢墓庚寅上還京辛卯定外任官在本籍五百里內者迴避封常甯子海善爲員勅是歲免直隸江南山東河南陝西浙江湖廣等省九十一州縣災賦有差朝鮮琉球安南入貢

四十三年甲戌春正月辛酉詔曰朕諮訪民瘼深悉力作艱難耕三十畝者輸租賦外約餘二十石衣食丁徭取給於此幸逢廉吏猶可有餘若誅求無藝則民無以爲生是故察吏所以安民要在大吏實心體恤也戊辰詔漢軍一家俱外任者酌改京員己巳上謁陵二月甲戌封淮神爲長源佑順大淮之神御書

靈濱安瀾額懸之癸巳上還宮以李基和爲江西巡撫能泰爲四川巡撫三月辛丑上御經筵己酉詔停熱審辛酉以吳洪爲甘肅提督賚送山東饑民回籍丙寅以溫達爲工部尙書夏四月癸酉命侍衛拉錫察視河源己卯上幸學營山遂閱永定河子牙河丙申上還京五月辛酉以于準爲貴州巡撫六月乙亥上巡幸塞外秋九月癸卯詔督撫調員違例者罪之侍郎常授招撫廣東海盜阿保位等二百三十七名就撫爲兵戊午刑部尙書王士禛以失出降官癸亥上還宮丁卯侍衛拉錫察視河源還自星宿海繪圖以進冬十月戊辰朔溶楊村舊河甲戌詔免順天河間二府及山東浙江二省明年稅糧庚辰以李振裕爲禮部尙書徐潮爲戶部尙書屠粹忠爲兵部尙書王掇爲刑部尙書吳滄爲左都御史癸未頒內製銅斗銅升於戶部命以鐵製頒行戊子以趙宏燮爲河南巡撫己丑命溶汾渭賈魯諸河辛卯上閱永定河十一月丁酉朔日有食之上還宮上以儀器測驗與七政曆不符欽天監官請罪免之郎中費仰殿以食雙乘市辛亥定吏部行取知縣例停督撫保薦戊午湖廣巡撫劉殿衡建御書



樓上斥其糜費並嚴禁藉修建侵帑累民者四川陝西總督博齊疏參涼州總兵官魏勳年老上曰魏勳前有軍功兵民愛戴與師帝賓麥良壘潘育龍俱係舊臣難得何可參耶壬戌誠修明史史臣殿公論明是非以成信史十二月乙酉天津總兵官藍理請沿海屯田從之甲午以御製詩集賜廷臣是歲免直隸江南山東湖廣廣東等省一百九州縣災賦有差朝鮮入貢

四十四年乙酉春正月戊午古文淵鑑成頒賜廷臣及於官學癸亥上幸湯泉二月乙丑朔上還宮癸酉上南巡閱河詔曰朕留意河防屢行閱視獲告成功茲黃水暢流尙須察驗形勢即循河南下所至勿繕行宮其有科歛累民者以軍法治罪壬午次靜海遣官奠故侍郎勵杜訥墓予諡文恪三月己亥諭山東撫臣曰百姓歡迎道左者日數十萬人計日迴鑾正當麥秀其各務稼穡毋致妨農乙巳上駐揚州授河臣張鵬翮方略辛亥上駐蘇州命選江南浙江舉貢生監善書者入京修書賜公福善大學士張玉書陳廷敬在籍大學士張英都統愛音圖白金賜大學士馬齊等皇輿表己未次松江閱射上書聖迹遺徽額

賜青浦孔氏賜故侍郎高士奇設文恪夏四月丙寅上駐杭州閱射庚午詔赦山東江蘇浙江福建死罪減一等戊寅御書至德無名額懸吳太伯祠並書季札董仲舒焦先周敦頤范仲淹蘇軾歐陽修胡安國米芾宗澤陸秀夫各匾額懸其祠乙酉上駐江甯閏四月癸卯上閱高家堰隄工辛酉上還京五月戊寅上親鞫郎中陳汝弼一案原汝弼罪刑部尙書安布祿左都御史舒裕以失獄免職庚辰以貝和諾爲雲南貴州總督丙戌上巡幸塞外六月甲午命行取知縣非再任者不得考選科道庚戌停廣東開礦丙辰上駐蹕熱河秋七月壬申河決清水溝韓莊命河臣察居民田舍以聞八月甲午免八旗借支兵餉銀七十萬兩戊午諭成龍免以石文晟爲湖廣總督庚申上發博洛河屯閱牧羣九月己巳進張家口丙子還京甲申以希福納爲左都御史達佳爲江甯將軍冬十月辛卯朔重修華陰西嶽廟成上製碑文丙午以富甯安爲漢軍都統十一月辛酉命蒙古公丹濟拉備兵推河察視策旺阿拉布坦己巳以李光地爲大學士宋肇爲吏部尙書調趙宏燮爲直隸巡撫癸酉詔免湖廣明年額賦及以

前通賦甲戌國子監落成御書夔倫堂額庚辰以汪瀨爲河南巡撫乙酉上謁  
陵巡幸近塞戊子設雲南廣南麗江二府學官許士人應試十二月壬寅上臨  
裕親王福全葬以阿靈阿兼理藩院尙書己酉上還宮丙辰以祖良璧爲福州  
將軍是歲免直隸江南湖廣廣東等省四十六州縣災賦有差朝鮮琉球入貢  
四十五年丙戌春正月乙酉命孫渣齊徐潮督濬淮揚引河順天考官戶部侍  
郎汪繹贊善姚士藹以取士不公褫職二月癸巳上巡幸畿甸丁未次靜海閱  
子牙河壬子還駐南苑以諸滿爲江甯將軍以王然爲浙江巡撫江南江西總  
督阿山劾江甯知府陳鵬年安奉聖訓不敬部議應斬先是乙酉年南巡陳鵬  
年遵旨不治行宮阿山故假他事劾之上命入京修書戊午上還宮二月庚申  
上御經筵辛巳賜施雲錦等二百八十九人進士及第出身有差詔直省建育  
嬰堂夏四月戊子朔日有食之加貴州提督李芳述鎮遠將軍乙未吳祐罷以  
梅錕爲左都御史五月己未以金世榮爲兵部尙書甲戌詔免直隸山東通賦  
丁丑以梁鼎爲福建浙江總督戊寅上巡幸塞外六月丁亥朔詔修功臣傳癸

已命梅鎔二高按容美土司田舜年獄壬寅命凡部寺咨取錢糧非由奏請者戶部月會其數以聞以藍理爲福建陸路提督辛亥四川巡撫能泰疏報安樂鐵索橋告成移化林營千總駐守秋七月庚申上駐蹕熱河甲子以德昭嗣封信郡王八月壬辰高家堰車邏壩澗河河隄告成九月己亥上還京冬十月乙酉朔敦拜罷以溫達爲吏部尙書希福納爲工部尙書庚寅武殿試諭曰今天下承平日久曾經戰陣大臣已少知海上用兵者益少他日台灣不無可慮朕甲子南巡由江甯登舟至黃天蕩江風大作朕獨立船頭射江豚了不爲意迨後渡江漸覺心動去歲渡江則心悸矣皆年爲之也問之宿將亦然今使高年奮勇効命何可得耶壬寅命大學士席哈納侍郎張廷樞蕭永藻覆按土司田舜年獄丁未以逆圖爲滿洲都統己酉詔免山西陝西江蘇安徽江西浙江福建湖北湖南廣東十省逋賦十一月癸酉命尙書金世榮侍郎巴錫范承烈督濬清河免八旗官兵貸官未歸銀三百九十五萬六千六百兩有奇甲戌以阿山爲刑部尙書庚辰上謁陵辛巳以邵穆布爲江南江西總督癸未以山東私

鑄多聽以小錢完正賦責有司連京鼓鑄甲申上巡幸塞外西藏達賴喇麻卒  
其下第巴匿之又立偽達賴喇麻拉藏汗殺第巴而獻其偽喇麻西甯喇麻商  
南多爾濟以聞十二月壬寅上還宮詔罪囚緩決至三四年者減一等辛亥郭  
世隆罷以趙宏燾爲廣東廣西總督是歲免直隸江南福建江西湖廣等省三  
十二州縣災賦有差朝鮮入貢

四十六年丁亥春正月丁卯詔南巡閱河往返舟楫不御室廬所過勿得供億  
丁巳梅銷免以蕭永藻爲左都御史戊戌次臺莊百姓來獻食物召耆老前詳  
詢農事生計良久乃發癸卯上閱濇淮套由清口登陸如曹家廟見地勢毗連  
山嶺不可疏鑿而河道所經直民廬舍墳墓悉當毀壞詰責張鵬翮等遂罷其  
役道旁居民騷呼萬歲命別勘視天然壩以下河道三月己未上駐江甯乙巳  
上駐蘇州夏四月甲申上駐杭州詔曰朕頃因視河駐蹕淮上江浙二省官民  
籲請臨幸朕勉徇羣情涉江而南方今二麥垂熟百姓沿河擁觀不無踐踏其  
令停迎送示朕重農愛民至意戊申以鄂克遜爲江甯將軍殷泰爲甘肅提督

五月壬子朔上次山陽示河臣方略癸酉上還京丙子解阿山尙書削張鵬翮宮保戊寅贈故河道總督靳輔太子太保予世職加福建提督吳英威略將軍贈死難運司高天爵官予諡忠烈以達爾占爲荊州將軍六月丁亥上巡幸塞外以巢可託爲左都御史起郭世隆爲湖廣總督七月壬子上駐蹕熱河丁卯車駕發喀拉河屯巡幸諸蒙古部落外藩來朝各賜衣幣八月甲辰次洮爾畢拉賜迎駕索倫總管塞音察克杜拉圖及打牲人銀幣貴州三江苗人作亂討平之九月癸亥上駐和爾博圖噶岔甲子閱察哈爾巴爾虎兵丁射冬十月辛巳以江蘇浙江旱發帑市米平糶截漕放賑免逋賦外藩獻駝馬卻之戊戌上還京己亥戶部議增雲南鑛稅命如舊額庚子金世榮免以蕭永藻爲兵部尙書十一月己酉朔詔曰頃以江浙旱災隨命減稅蠲逋截漕其江浙兩省明年應出丁錢悉予蠲免被災之處並免正賦使一年之內小民絕迹公庭優游作息副朕惠愛黎元至意己未詔台灣客民乏食願歸者聽附公務船內渡以汪悟禮爲漢軍都統己亥詔江浙諸郡縣興修水利備旱澇十二月丙戌以溫達

爲大學士馬爾漢爲吏部尙書耿額爲兵部尙書巢可託爲刑部尙書富甯安  
王九齡爲左都御史丙午賜親王以次內大臣侍衛白金有差是歲免直隸江  
南江西福建湖廣等省三十二州縣衛災賦有差朝鮮琉球入貢

四十七年戊子春正月庚午浙江大嵐山賊張念一朱三等行劫慈谿上虞  
縣官兵捕平之辛未重修南嶽廟成御製碑文以覺羅孟俄洛爲奉天將軍乙  
亥詔俄留湖廣江西漕糧四十萬石留於江南六府平糶二月庚寅上御經筵  
壬辰遣侍郎穆丹按大嵐山獄學士二高按紅苗獄甲午上巡畿甸丙午詔選  
羅使臣挈帶土貨許隨處貿易免徵其稅三月丙辰上還駐暢春園戊午以希  
思哈李繩宗爲漢軍都統閏三月戊寅朔重修北鎮廟成御製碑文乙未以施  
世驃爲廣東提督席柱爲西安將軍夏四月己酉宋犖罷以徐潮爲吏部尙書  
以齊世武爲四川陝西總督戊午山東巡撫趙世顯報捕獲朱三父子解往浙  
江上曰朱三父子游行教書寄食人家若因此捕拿株連太多可傳諭知之辛  
酉湖廣提督俞益謨密請勦除紅苗上以紅苗無大罪不許以阿喇衲爲蒙古

都統李林盛爲漢軍都統內大臣明珠卒命皇三子胤祉奠茶酒賜馬四匹五月甲申以王鴻緒爲戶部尙書富甯安爲禮部尙書穆和倫爲左都御史丙戌上巡幸塞外乙未詔免大嵐山賊黨太倉人王昭駿伯叔兄弟連坐罪六月丁未上駐蹕熱河丁巳九卿議覆大嵐山獄上得旨誅其首惡者朱三父子不可留緣坐可改流徒巡撫王然提督王世臣俱留任受傷官兵俱議赦丁卯清文鑑成上製序文秋七月丁丑諭刑部免死流人在配犯罪者按誅之癸未平定朔漠方略成上親製序文壬辰上行圍二鬲奏按紅苗殺人之廖老辛等斬梟擅自遣兵前往苗寨之守備王應瑞遣戍從之八月甲辰朔日有食之壬戌上迴鑾駐永安拜昂阿九月乙亥上駐布爾哈蘇台丁丑召集廷臣行宮宣示皇太子胤祊罪狀命拘執之送京幽禁己丑上還京丁酉廢皇太子胤祊頒示天下冬十月甲辰削貝勒胤禩爵乙卯以王揆爲工部尙書張鵬翮爲刑部尙書辛酉上幸南苑行圍以辛泰爲蒙古都統十一月癸酉朔削直郡王胤禔爵幽之己卯致仕大學士張英卒予祭葬諡文端辛巳副都御史勞之辨奏保廢太



子奪職杖之內戌召集廷臣議建儲貳阿靈阿鄂倫岱揆敘王鴻緒及諸大臣以皇八子胤禛請上不可戊子釋廢太子胤礽己丑王大臣請復立胤礽爲皇太子丙申以宗室發度爲黑龍江將軍庚子復胤禛貝勒十二月甲辰褒卹死難生員嵇永仁王龍光沈天成范承譜附祀范承謨祠承謨子巡撫范時宗請之也丁巳以陳詵爲湖廣巡撫蔣陳錫爲山東巡撫黃秉中爲浙江巡撫劉蔭樞爲貴州巡撫是歲免山東福建湖廣等省六十州縣災賦有差朝鮮入貢

四十八年己丑春正月癸巳召集廷臣問舉立胤禛孰爲倡議者羣臣皇恐莫敢對乃進大學士張玉書而問之對曰先聞之馬齊上切責之次日列馬齊罪狀宥死拘禁已而上徐察其誣釋之內申上幸南苑己亥命侍郎赫壽駐藏協辦藏事初拉藏汗與青海爭立達賴喇嘛不決特命大臣往監臨之王鴻緒李振裕免二月己酉上巡幸畿甸以宗室楊福爲黑龍江將軍覺羅孟俄洛爲寧古塔將軍王文義爲貴州提督戊午以嵩祝署奉天將軍戊辰上還宮庚午以張鵬翮爲戶部尙書張廷樞爲刑部尙書三月辛巳復立胤礽爲皇太子昭告

宗廟頒詔天下甲午賜趙熊詔等二百九十二人進士及第出身有差夏四月甲辰以富崧安爲吏部尙書穆和倫爲禮部尙書穆丹爲左都御史移禁胤禔於公所遣官率兵監守丁卯上巡幸塞外五月甲戌上駐蹕熱河六月戊午康熙王椿泰薨諡曰悼子崇安襲封秋七月庚寅以殷泰爲四川陝西總督噶禮爲江南江西總督江琦爲甘肅提督師懿德爲江南提督戊戌上行圍八月己亥朔日有食之加陝西提督潘育龍鎮綏將軍九月庚寅上還京以年羹堯爲四川巡撫冬十月壬寅詔福建廣東督撫保舉深諳水性熟知水師者戊午册封皇三子胤祉誠親王皇四子胤禛雅親王皇五子胤祺恒親王皇七子胤祐溥郡王皇十子胤禛敦郡王皇九子胤禔皇十二子胤禔皇十四子胤禔俱爲貝勒壬戌詔免江蘇被災之淮揚徐山東之兗州河南之歸德明年地丁額賦十一月丙子詔各省解部之款過多可酌量截留以備急需安郡王馬爾渾薨諡曰愨子華玘襲己卯加漕運總督桑額太子太保庚寅上與大學士李光地論水脉水源泰岱諸山自長白山來涉水伏流黃河未到積石亦是伏流蒙古

人有書言之甚詳江源亦自崑崙來至於岷山乃不伏流耳遣張鵬翮噶敏圖按江南宜思恭虧帑獄十二月己亥上謁陵己未上還宮命馬齊管鄂羅斯貿易事刑部尙書巢可託免是歲免直隸江蘇安徽山東河南湖廣等省五十三州縣災賦有差朝鮮琉球入貢

四十九年庚寅春正月庚寅命修滿蒙合璧清文鑑二月丁酉上巡幸五臺山吏部尙書徐湖乞休允之三月己巳上還京乙亥命編纂字典詔以故大學士李蔚嫡孫主事李敏啟擢補太常寺少卿戊寅勅封西藏胡必爾汗波克塔爲六世達賴喇嘛辛巳詔免浙江杭湖二府未完漕米三萬九千餘石夏四月乙巳調蕭永藻爲吏部尙書王揆爲兵部尙書五月己酉朔上巡幸塞外癸酉次花峪溝閱吉林黑龍江官兵丁丑上駐蹕熱河六月己亥命諸皇子恭迎皇太后至熱河避暑戊午刑部尙書張廷樞免秋七月壬午按事湖南尙書蕭永藻等疏報巡撫提督互訐案查審俱實得旨愈益謨休致趙申喬革職留任閏七月甲寅上行圍八月乙亥詔福建漳泉二府旱連江浙漕糧三十萬石賑之並

免本年未完額賦丙戌上還駐熱河庚寅以范時崇爲福建浙江總督額倫特爲湖南提督九月辛丑上奉皇太后還宮辛亥希福納免時戶部虧蝕購辦草豆銀兩事覺積十餘年歷任尙書侍郎凡百二十人虧蝕至四十餘萬上寬免逮問責限償完希福納現任尙書特斥之以穆和倫爲戶部尙書貝和諾爲禮部尙書冬十月甲子詔曰朕臨御天下垂五十年誠念民爲邦本政在養民迭次蠲租數萬萬以節儉之所餘爲渙解之宏澤惟體察民生未盡康阜良由生齒日繁地不加益宜沛鴻施藉培民力自康熙五十年始普免天下錢糧三年而徧直隸奉天浙江福建廣東廣西四川雲南貴州九省地丁錢糧察明全免歷年逋賦一體豁免其五十一年五十二年應蠲省分屆時候旨地方大吏以及守令當體朕保乂之懷實心愛養庶幾昇平樂利有可徵矣文到其刊刻頒布咸使聞知丁卯諭外藩已朝行在勿庸朝正丙子以郭璵爲雲南貴州總督以郭世隆爲刑部尙書鄂海爲湖廣總督癸未諭大學士江南虧空錢糧多至數十萬兩此或朕數次南巡地方挪用張鵬翮謂俸工可以抵補牧令無俸仍

以累民莫若免之爲善其會議以聞十一月辛卯朔詔凡遇蠲賦之年免業主七分佃戶三分著爲令大學士陳廷敬以老乞休溫旨慰諭命致仕乙巳上謁陵以蕭永藻爲大學士王掾爲禮部尙書徐元正爲工部尙書丁未以孫徵灝爲兵部尙書乙卯以桑額爲吏部尙書十二月癸酉以赫壽爲漕運總督戊寅上還京辛巳詔曰朕因朝列舊臣漸次衰謝順治年間進士去職在籍者已無多人王士禛江皋周敏政葉矯然徐淑嘉皆以公過屏廢俱復還原官以趙申喬爲左都御史是歲免直隸江南等省七州縣災賦有差朝鮮安南入貢

五十年辛卯春正月癸丑上巡畿甸視通州河堤二月辛酉以班迪爲滿洲都統善丹爲蒙古都統丁卯閱筐兒港命建挑水壩次河西務上登岸步行二里許親置儀器定方向釘椿木以紀丈量之處諭曰用此法可以測量天地日月交食算法原於易用七九之奇數不能盡者用十二二十四之偶數乃能盡之即取象十二時二十四氣也庚午上還京辛巳上御經筵三月庚寅王大臣以萬壽節請上尊號自平滇以來至是凡四請矣上謙挹有素終不之許夏四月

庚申徐元正養親回籍以陳誥爲工部尙書庚辰上奉皇太后避暑熱河乙未命禮部祈雨庚子大雨丙午留京大學士張玉書卒上悼惜賦詩一篇遣官治喪賜銀一千兩加祭葬諡文貞己酉詔免江蘇無著銀十萬兩有奇丙辰召致仕大學士陳廷敬入閣辦事增鄉會試五經中額六月戊辰設廣西西隆州儒學訓導秋七月丙辰上行圍八月庚午高宗純皇帝生以王原祁爲掌院學士設先賢子游後裔五經博士九月戊申上奉皇太后還宮監理有罪免以楊琳爲福建陸路提督馬際伯爲四川提督停本年秋決冬十月丙辰詔免台灣五十二年應徵稻穀貝和諾免以嵩祝爲禮部尙書戊午詔前旨普免天下錢糧五十二年輪及山西河南陝西甘肅湖北湖南六省地丁錢糧及逋欠俱行蠲免庚午以碩鼎爲滿洲都統瑚世巴馬爾賽爲蒙古都統戊寅免朝鮮白金豹皮歲貢庚辰詔舉孝義辛巳命張鵬瀚置獄揚州按江南科場案壬午鄂緒耿頌齊世武悟禮等有罪褫職拘禁趙申喬疏劾新科編修戴名世恃才放蕩語多悖逆下部嚴審十一月丙戌以殷特布爲漢軍都統隆科多爲步軍統領張

谷貞爲雲南提督丁未上謁陵賜守陵官役馬匹白金十二月癸酉上還宮癸未禘祭太廟是歲免直隸安徽等省八州縣災賦有差朝鮮琉球入貢丁戶二千四百六十二萬一千三百二十四田地六百九十三萬三百四十四頃三十四畝徵銀二千九百九十萬四千六百五十二兩八錢鹽課銀三百七十二萬九千二百二十八兩鑄錢三萬七千四百九十三萬三千四百有奇

五十一年壬辰春正月丙午擢編修張逸少爲翰林院侍讀學士故大學士張玉書之子也壬子命內外大臣具摺陳事摺奏自此始癸丑上巡幸畿甸詔右衛將軍宗室費揚古辦事誠實供職年久且係王子可封爲輔國公二月丁巳詔宋儒朱子配享孔廟在十哲之次江蘇巡撫張伯行與總督噶禮互訐俱解任交張鵬翮赫壽查審福建浙江總督范時崇疏陳沿海漁船只許單桅不許越省行走交地方文武鈐束上曰此事不可行漁戶併入水師管則兵弁侵欺之矣盜賊豈能盡除竊發何地無之只視有益於民者行之不當以文法爲捕其也戊寅命卓異武官照文職引見庚辰上還京壬午詔曰承平日久生齒日

繁嗣後滋生戶口勿庸更出丁錢即以本年丁數爲定額著爲令三月辛卯諭  
大學士繙譯本章甚有關繫昨見本內假官二字竟譯作僞官舛錯殊甚其嚴  
飭之丁酉上御經筵夏四月丁巳賜王世琛等百七十七人進士及第出身有  
差甲子以康泰爲四川提督定會試分省取中例壬申諭故大學士熊賜履夙  
學舊臣身歿以後時軫於懷聞其子已長成可令來京錄用壬戌予故一等待  
衛海青副都統銜予祭葬諡果毅致仕大學士陳廷敬卒命皇三子奠茶酒御  
賦輓詩命南書房翰林勳廷儀張廷玉齋焚予治喪銀一千諡文貞詔明年六  
旬萬壽二月特行鄉試八月會試以嵩祝爲大學士黑碩咨爲禮部尙書滿篤  
爲工部尙書以王掾爲大學士陳詵爲禮部尙書起張廷樞爲工部尙書丙子  
上奉皇太后避暑熱河啟鑿壬午上駐蹕熱河五月壬寅命有司稽察流民徙  
邊種地者以穆丹爲左都御史鄂代爲蒙古都統六月癸丑朔日有食之丁巳  
命穆和倫張廷樞覆按江南督撫互訐案湖廣鎮守紅苗吳老化率毛都塘等  
五十二寨內附辛酉以張朝午爲廣西提督秋八月癸丑上行圍戊寅詔朝鮮



遇有中國漁船違禁至界汛許拘執以聞鎖草苗民續內附八十三寨九月庚戌上奉皇太后還宮皇太子胤礽復以罪廢錮於咸安宮冬十月壬戌穆和倫等覆按江南獄上上命奪噶禮職張伯行復任以揆敍爲左都御史赫壽爲江南江西總督十一月乙酉前福建提督藍理獄上應死上念征台灣功特原之己亥羣臣以萬壽六旬請上尊號不許丁未以復廢皇太子胤礽告廟宣示天下己酉上謁陵賜守陵大臣白金十二月甲戌上還京是歲免直隸江南山東浙江等省二十三州縣災賦有差朝鮮入貢

五十二年癸巳春正月戊申詔封後藏班禪胡土克圖喇麻爲班禪額爾得尼二月庚戌趙申喬疏言太子國本應行冊立上以建儲大事未可輕定宣諭廷臣以原疏還之乙卯上巡幸畿甸編修戴名世以著述狂悖棄市進士方苞以作序干連免死入旗旋赦出之乙亥上還駐暢春園三月戊寅朔諭王大臣朕昨還京見各處爲朕保釐乞福者不計其數實覺愧汗萬國安卽朕之安天下福卽朕之福祝延者當以茲爲先朕老矣臨深履薄之念與日俱增敢滿假乎

又諭各省祝壽老人極多倘有一二有恙者可令太醫看治朕於十七日進宮  
經棚老人已得從容瞻覲十八日正陽門行禮不必再至龍棚各省漢官傳諭  
知悉甲午上還宮各省臣民夾道俯伏歡迎上駐輦慰勞之乙未萬壽節上朝  
慈寧宮御太和殿受賀頒詔覃恩錫高年舉隱逸旌孝義蠲通負鰥寡孤獨無  
告者官爲養之罪非殊死咸赦除焉壬寅召直省官員士庶年六十五以上者  
賜宴於暢春園皇子視食宗室子執爵授飲扶掖八十以上老人至前親視飲  
酒諭之曰古來以養老尊賢爲先使人人知孝知弟則風俗厚矣爾耆老當以  
此意告之鄉里昨日大雨田野霑足爾等速回無誤農時是日九十以上者三  
十三人八十以上者五百三十八人各賜白金加祝釐老臣宋犖太子少師田  
種玉太子少傅甲辰宴八旗官員兵丁開散於暢春園視食授飲視飲賜金同  
前是日九十以上者七人八十以上者一百九十二人夏四月甲寅以鄂海爲  
陝西四川總督額倫特爲湖廣總督高其位爲湖廣提督四川提督岳昇龍請  
入籍四川許之丁卯遣官告祭山川古陵闕里五月丙戌上奉皇太后避暑熱

河調張廷樞爲刑部尙書王頊齡爲工部尙書頒賚蒙古老人白金辛丑詔停  
本年秋決閏五月乙卯賚熱河老人白金御史陳汝咸招撫海寇陳尙義入見  
詢海上情勢及洋船形質命於金州安置置水師營六月丁丑修律算書秋七  
月壬子詔宗人削屬籍者子孫分別繫紅帶紫帶載名玉牒丙寅上行圍八月  
丁丑蒙古鄂爾多斯王松阿拉布請於察罕託灰遊牧不許命遊牧以黃河爲  
界從總兵范時捷請也九月甲子上奉皇太后還宮辛未以江南漕米十萬石  
分運廣東福建平糶冬十月丙子以張鵬翮爲吏部尙書乙酉賜王敬銘等一  
百四十三人進士及第出身有差十一月己酉詔免廣東福建甘肅二十州  
縣衛明年稅糧癸亥上謁陵十二月己卯以赫奕爲工部尙書辛卯令文武科  
目願兼應者許改試一科壬辰上還京甲午以五高爲蒙古都統辛丑給祭太  
廟是歲免浙江十州縣災賦有差朝鮮琉球入貢

五十三年甲午春正月己未命修壇廟殿廷樂器癸亥戶部請禁小錢上曰凡  
事必期便民若不便於民而惟言行法雖厲禁何益戊辰上巡幸畿甸丁卯以

何天培爲京口將軍二月甲戌詔停今年秋審矜疑人犯審理具奏配流以下減等發落乙酉上還京癸丑命侍郎常泰少卿陳汝成赴甘肅賑撫災民丁巳前尙書王鴻緒進明史列傳二百八十卷命付史館夏四月戊子改師懿德爲甘肅提督辛卯上奉皇太后避暑熱河六月乙亥詔拉藏汗年近六十二子在外宜防外患善自爲謀癸未以炎暑免從臣晚朝秋七月辛卯詔以江南暎旱浙江米貴河南歉收截漕三十萬石分運三省平糶八月乙亥上行圍九月丙寅上奉皇太后還宮冬十月己巳朔命張鵬翮阿錫鼎往按江南牟欽元獄己丑命大學士南書房翰林考定樂章十一月勅戶部截漕三十餘萬石於江南浙江備賑戊申免甘肅靖邊二十八州縣衛明年額賦誠親王胤祉等以御製律呂正義進呈得旨律呂歷法算法三書共爲一部名曰律歷淵源甲寅冬至祀天於圓丘奏新樂丙辰上巡幸塞外貝勒胤禩屬下人雅齊布有罪伏誅遣何國棟測量廣東雲南等省北極出地及日景十二月癸酉上駐特布克賜隨圍蒙古兵銀幣己丑上還京辛卯洗岷邊外生番喇子等一十九族內附是歲

免江南河南甘肅浙江湖廣等省百二十二州縣災賦有差朝鮮入貢

五十四年乙未春正月甲子停五經中式例封阿巴台吉德木楚克爲輔國公詔貝勒胤禩延壽溺職停食俸二月戊辰朔張伯行緣事解任交張鵬翮審理己巳以施世綸爲漕運總督辛未上巡幸畿甸諭巡撫趙宏燮曰去年臘雪豐盈今年春雨應節民田想早播種但慮起發太盛或有二疸之虞可示農民芸耨宜疏以防風霾又諭朕時巡畿甸見民生差勝於前但誦讀者少風俗攸關宜令窮僻鄉壤廣設義學勸令讀書爾有司其留意甲午以杜呈泗爲江南提督穆廷斌爲福建陸路提督三月己亥以蒙古馬拉忒等部十四旗雪災命尙書穆和倫運米往賑教之捕魚爲食庚子以趙宏燮爲直隸總督任巡撫事以陸森爲甯古塔將軍夏四月庚午賜徐陶璋等一百九十人進士及第出身有差己卯師懿德奏策旺阿拉布坦兵掠哈密遊擊潘至善擊敗之命尙書富甯安將軍席柱率師援勦祁里德赴推河諭喀爾喀等備兵庚辰徵外藩兵集歸化城調打牲索倫兵赴推河己丑諭議政大臣朕曾出塞親征周知要害今

討策安阿喇布坦進兵之路有三一由噶斯直抵伊里河源趨其巢穴一越哈密吐魯番深略敵境一取道喀爾喀至博克達額倫哈必爾漢度嶺扼險三路並進大功必成壬午漕運總督耶廷極卒上稱其撫恤運丁歷運無阻予祭葬諡溫勤辛卯上奉皇太后避暑熱河乙未命富甯安分兵戍噶斯口總兵路振聲駐防哈密五月丙午黑龍江將軍宗室楊福卒賜銀一千兩命侍衛尙崇義傅森馳驛賜奠諡襄毅命其子三官保暫署父任戊午內閣侍讀圖里琛使於鄂羅斯使備兵六月壬申命都統圖斯海等赴湖灘河朔運糧甲戌富甯安席柱疏報進兵方略得旨明年進兵丁亥兵部尙書孫徵灝卒賜鞍馬二散馬二銀五百兩諡清端秋七月甲午朔命和托輝公博貝招撫烏梁海辛酉命公傅爾丹往烏蘭古等處屯田八月辛未大學士李光地乞假歸上賦詩送之癸酉上行闕壬辰撤噶斯口戍兵還肅州九月己酉博貝招撫烏梁海部來歸冬十月丙寅上諭大學士朕右手病不能寫字用左手執筆批答奏摺期於不洩漏也辛巳上奉皇太后還宮詔順天保定河間永平宣化今歲雨溢穀耗不登所

有五府應完五十五年稅糧悉蠲除之十一月甲午以范時崇爲左都御史覺羅滿保爲浙江福建總督宗室巴塞爲蒙古都統庚子停京師決囚辛丑以宋臣范仲淹從祀孔廟己未冬至祀天於圓丘始用御定雅樂十二月己巳以塔拜爲杭州將軍命護軍統領晏布帥師駐西甯甲申張伯行以疑賊誣參論罪應死上原之起爲倉場侍郎是歲免江南湖南二省二十四州縣衛災賦有差朝鮮琉球入貢

五十五年丙申春正月壬子上幸湯泉二月乙丑命副都統蘇爾德經理圖呼魯克等處屯田癸酉上還駐暢春園丙子詔免安南歲貢犀角象牙己卯上巡幸畿甸庚寅定丁隨地出例三月丁酉卹贈廣西右江勦擒傷亡參將王啓雲官廕庚子上還宮乙巳召席柱還以晏布代之路振聲參軍事癸丑蒙古圖爾胡特貝子阿拉布珠爾請從軍命率蒙古成噶斯口貴州巡撫劉蔭樞疏請罷兵命乘傳詣軍周閱議奏閏三月癸亥以額倫特署西安將軍滿丕署湖廣總督丁丑以左世永爲廣西提督壬午發京倉米二十萬石賑順天永平五城粥

廠展期至秋命禮部祈雨夏四月癸卯上奉皇太后避暑熱河五月庚申上駐熱河齋居祈雨起馬齊爲大學士穆和倫爲戶部尙書壬戌發倉米平糶預發八旗兵糧甲子雨上曰宋儒云求雨得雨旱豈無因此言可味也已巳京師遠近雨足上復常膳乙酉赫奕免以孫渣齊爲工部尙書六月丙辰上幸湯泉秋七月辛未命移噶斯口防軍分成察罕烏蘇噶順癸未上行圍八月乙卯前奉天府尹董宏毅坐將承德等九州縣米豆改徵銀兩致倉儲闕乏黜官九月庚午以蔣陳錫爲雲南貴州總督甲申上奉皇太后還宮冬十月丁亥朔詔刑部積歲緩決長繫人犯分別減釋之停本年秋決戊子以托留爲黑龍江將軍趙宏燦爲兵部尙書癸巳詔近以策妄阿喇布坦侵入哈密徵兵備邊一切飛芻輓粟經過邊境不無借資民力所有山西陝西甘肅四十八州縣衛應徵明年銀米穀草及積年逋欠悉與蠲除丁酉詔肅州與布隆吉爾毗連迤北西吉木達里圖金塔寺等處招民墾種以楊琳爲廣東廣西總督以宗室巴賽爲滿洲都統晏布爲蒙古都統丙午策旺阿喇布坦執青海台吉羅卜藏丹濟布犯噶



斯口官兵擊走之命額倫特駐師西甯分兵戍噶斯口布隆吉爾散秩大臣阿喇納赴巴爾庫爾參贊軍事十一月乙丑以傅爾丹額爾錦爲領侍衛內大臣戊辰上謁陵甲申上巡行塞外盜發明陵命置之法十二月己酉上還京詔免順天永平三十五州縣明年地丁稅糧其積年逋賦併除之是歲免直隸江南山東浙江江西湖廣等省六十三州縣災賦有差朝鮮安南入貢

五十六年丁酉春正月丁卯修周易折中成頒行學宮壬午以徐元夢爲左都御史朱軾爲浙江巡撫二月丙戌朔上巡幸畿甸乙未徵奉天吉林兵益祁爾德軍癸卯上還駐暢春園丁未定盜案法無可寬情有可原例順承郡王諾羅布薨諡曰忠子錫保襲封左都御史揆敘卒予祭葬諡文端三月丁巳上御經筵戊寅以富甯安爲靖逆將軍傅爾丹爲振武將軍祁爾德爲協理將軍視師防邊壬午上巡視河西務隄夏四月乙酉上還駐暢春園乙未發通州倉米分貯直隸州縣備賑丙申碣石鎮總兵陳昂奏天主教堂各省林立宜行禁止從之以孫柱范時崇爲兵部尙書辛丑上奉皇太后避暑熱河五月庚申九卿議

王貝勒差人出外查無勘合即行參究六月壬子傅爾丹襲擊厄魯特博羅布爾哈蘇斬俘而還兵部尙書趙宏燦卒予祭葬諡清端秋七月丙辰策妄阿喇布坦遣其將策岑敦多布倭掠拉藏癸亥富甯安襲擊厄魯特於通俄巴錫進及烏魯木齊毀其田禾還軍遇賊畢留圍擊敗之陣亡灰特台吉扎穆畢追封輔國公八月壬午朔上行圍九月辛未以振路揚署四川提督河南奸民亢瑛滋事官兵捕之瑛走死命尙書張廷樞學士勒什布往鞫得前巡撫李錫貪虐激變狀以聞李錫褫職論死賊黨伏誅冬十月乙酉命侍郎梁世勳海壽往督巴爾庫爾屯田庚子上奉皇太后還宮乙巳命內大臣公策旺諾爾布將軍額倫特侍衛阿齊圖等率師戍青海以宗室公吞珠爲禮部尙書蔡升元爲左都御史十一月壬子命停決囚乙丑皇太后不豫上省疾慈甯宮辛未詔曰帝王之治必以敬天法祖爲本合天下之心以爲心公四海之利以爲利制治於未亂保邦於未危夙夜兢兢所以圖久遠也朕八齡踐祚在位五十餘年今年近七旬矣當二十年時不敢逆計至三三十年時不敢逆計至四十賴宗社之

靈今已五十七年矣非涼德所能致也齒登耆壽子孫衆多天下和樂四海乂安雖未敢謂家給人足俗易風移而欲使民安物阜之心始終如一殫竭思慮耗敝精力殆非勞苦二字所能盡也古帝王享年不永書生每致譏評不知天下事煩不勝其勞慮也人臣可仕則仕可止則止年老致仕而歸猶得抱子弄孫優游自適帝王仔肩無可旁委舜歿蒼梧禹殂會稽不遑甯處終鮮止息洪範五福終於考終命以壽考之難得也易逝六爻不及君主人君無退藏之地也豈當與臣民較安逸哉朕自幼讀書尋求治理年力勝時挽強決拾削平三藩綏輯漠北悉由一心運籌未嘗妄殺一人府庫帑金非出師賑饑未敢妄費巡狩行宮不施采繡少時卽知聲色之當戒佞倖之宜遠幸得粗致謐安今春頗苦頭暈形漸羸瘦行圍塞外水土較佳體氣稍健每日騎射亦不疲乏復以皇太后違和頭暈復作步履艱難倘一時不諱不得悉朕衷曲死者人之常理要當於明爽之時舉平生心事一爲吐露方爲快耳昔人每云帝王當舉大綱不必兼綜細務朕不謂然一事不謹卽貽四海之憂一念不謹卽貽百年之患

朕從來蒞事無論鉅細莫不慎之又慎惟年既衰暮祇懼五十七年憂勤惕勵之心隳於末路耳立儲大事豈不在念但天下大權當統於一神器至重爲天下得人至難是以朕垂老而惓惓不息也大小臣工能體朕心則朕考終之事畢矣茲特召諸子諸卿士詳切言之他日遺詔備於此矣甲戌免八旗借支銀二百萬兩丙子詔免直隸安徽江蘇浙江湖廣陝西甘肅等省積年逋賦江蘇安徽並免漕項銀米十分之五十二月甲申皇太后病勢漸增上疾七十餘日矣脚面浮腫扶掖日朝寧壽宮丙戌皇太后崩頒遺詔上服衰割辮移居別宮己酉上還宮是歲朝鮮入貢

五十七年戊戌春正月乙卯上有疾幸湯泉戊寅賜防邊軍士衣二萬襲二月庚寅拉藏乞師命侍衛色楞會青海兵往援癸卯以路振聲爲甘肅提督檢討朱天保上疏請復立胤礽爲皇太子上於行宮親訊之曰爾何知而違旨上奏朱天保曰臣聞之臣父臣父令臣言之上曰此不忠不孝之人也命誅之丁未上還宮碣石鎮陳昂疏請洋船入港先行查取大礮方許進口貿易部議不行

三月癸丑減大興宛平門廠房稅辛酉上大行皇后諡曰孝惠仁憲端懿純德  
順天翊聖章皇后丙寅以顏壽爲右衛將軍黃秉銳爲福州將軍戊辰裁起居  
注官甄別不職學政叢澍等七員俱褫職丁丑命浙江南北新關稅交同知管  
理戊寅浙江巡撫朱軾請修海甯石塘從之夏四月乙酉葬孝惠章皇后於孝  
東陵丁亥賜汪應銓等一百七十一人進士及第出身有差辛卯上幸熱河穆  
和倫免以孫渣齊爲戶部尙書五月癸丑以徐元夢爲工部尙書丁巳額倫特  
奏拉藏汗被陷身亡二子被殺達賴班禪均被拘己未浙江福建總督滿保疏  
台灣一郡有極衝口岸九處次衝口岸十五處派人修築酌移員弁設淡水營  
守備從之六月壬辰遣使册封琉球故王曾孫尙敬爲中山王己丑大學士李  
光地卒命皇五子恒親王胤祺往奠茶酒賜銀一千兩徐元夢還京護其喪事  
諡文貞丁未賜哈密軍士衣四百襲秋七月己未打箭爐外墨裏喇麻內附甲  
戌修省方盛典八月壬子索倫水災遣官賑之孟光祖伏誅戊子上行圍甲午  
禮部尙書吞珠卒予祭葬諡恪敏總兵官仇機有罪伏誅閏八月戊辰詔曰夷

虜跳梁大兵遠駐西邊一切征繕秦民甚屬勞苦所有陝西甘肅明年地丁糧稅俱行蠲免懋年通賦亦盡除之九月己卯命都統阿爾納總兵李耀率師赴噶斯口柴日本駐防丙戌以王碩齡爲大學士陳元龍爲工部尙書甲辰上還京將軍額倫特侍衛色楞會帥喀喇烏蘇屢收賊賊愈進帥無後繼矢竭力戰歿於陣冬十月甲寅停本年決囚丙辰命皇十四子貝子胤禔爲撫遠大將軍視師青海命殉難總督甘文焜知府黃庭柏建祠列祀甲子詔四川巡撫年羹堯軍興以來辦事明敏卽升爲總督命翰林科道輪班入直戊辰上駐湯泉命皇七子胤祐皇十子胤禛皇十二子胤禩分理正黃正白正藍滿蒙漢三旗事務十一月丙子上還駐暢春園福建巡撫陳瑨卒贈禮部尙書諡清端以宜兆熊爲漢軍都統十二月丙辰上謁陵己未孝惠章皇后升祔太廟位於孝康章皇后之左頒詔天下雲南撤甸苗人歸順己巳上還宮是歲免江南福建甘肅湖廣等省二十六州縣衛災賦有差朝鮮琉球安南入貢

五十八年己亥春正月甲戌朔日有食之詔曰日食三始垂象維昭宜修人事

以倣天戒臣工其舉政事闕失以聞乙未上幸湯泉庚子上還駐暢春園辛丑詔立功之臣退閒世職准子弟承襲若無應襲之人給俸終其身壬寅命被漕米四十三萬石留江蘇安徽備荒二月己巳上巡幸畿甸己卯學士蔣廷錫表進皇輿全覽圖頒賜廷臣庚申上還駐暢春園辛未命都統法喇撫輯裏塘巴塘護軍統領噶爾弼同理軍事三月乙未侍郎色爾圖以運餽遲延罷命巡撫噶什圖接管夏四月乙巳命撫遠大將軍胤禔駐師西甯癸丑上巡幸熱河五月戊寅以麥大熟命民間及時收貯庚辰以揚都爲蒙古都統浙江正考官索泰賄賣關節在籍學士陳恂說合陳鳳墀黃緣中式均論死並罪其保薦索泰爲考官者南陽標兵執辱知府沈澗總兵高成革職游擊王洪道論死兵處斬六月甲辰以貝勒滿篤祜爲滿洲都統丁未年羹堯噶爾弼法喇先後奏副將岳鍾琪招輯裏塘巴塘就撫命法喇進駐巴塘年羹堯撥兵接應丙寅以馬見伯爲固原提督秋七月癸未以宗查木爲西安將軍八月庚戌上行圍庚申振威將軍傅爾丹奏鄂爾齊圖二處築城設站命尙書范時崇往董其役九月乙

未諭西審見有新胡畢勒罕質係達賴後身令大將軍遣官帶兵前往西藏安禪戊戌安郡王華圮薨諡曰節冬十月丁未上還京壬子命蒙養齋舉人王蘭生修正音韻圖甲寅固原提督潘育龍卒贈太子少保予祭葬諡襄勇十一月丙子禮部尙書陳誥致仕庚寅增江西解額十二月壬寅以蔡升元爲禮部尙書田從典爲左都御史戊申西安將軍額倫特之喪至京命皇五子恒親王胤祺皇十二子貝子胤禔迎奠庚申命截湖廣漕糧十萬石留於本省備荒辛酉詔曰比年興兵西討遠歷邊陲居送行賚民力勞瘁所有沿邊六十六州縣衛所明年額徵銀米俱行蠲免是歲免江蘇安徽等省十三州縣災賦有差朝鮮琉球入貢

五十九年庚子春正月丁酉命撫遠大將軍胤禔移師穆魯斯烏蘇以宗室延信爲平逆將軍領兵進藏以公策旺諾爾布參贊軍務命西安將軍宗查木駐西甯平郡王訥爾素駐古木二月甲辰上巡幸畿甸癸丑命噶爾弼爲定西將軍率四川雲南兵進藏册封新胡畢勒罕爲六世達賴喇嘛辛酉上還駐暢春



園三月己丑命雲南提督張谷貞駐防麗江中甸丙申命靖逆將軍富甯安進師烏魯木齊散秩大臣阿喇衲進師吐魯番祁里德領七千兵從布婁爾傅爾丹領八千兵從布拉罕同時進擊準噶爾夏四月戊申上巡幸熱河五月辛巳以早求言壬午雨六月己亥陝西饑連河南積穀往賑丙辰保安懷來地震遣官賑之秋七月丙寅朔日有食之癸酉富甯安擊賊於阿克塔斯伊爾布爾和諾敗之擒其台吉垂木拍爾阿喇衲師至齊克塔木遇賊擊破之盡虜其衆進擊皮禪城降之師至吐魯番會阿克蘇爾坦率衆迎降丙戌傅爾丹擊賊於格爾厄爾格斬獲六百陣擒宰桑貝肯焚其積衆而還貝肯送京祁里德收賊於鏗額爾河降其宰桑色布騰等二千餘人八月戊戌上行圍庚子琉球請令其陪臣子弟入國子監讀書許之癸丑平逆將軍延信連敗賊衆於卜克河丁巳又敗賊衆於綽馬喇賊將策零敦多布遁定西將軍噶爾弼率副將岳鍾琪自拉里進兵戊午克西藏執附賊喇嘛百餘斬其渠五入撫諭唐古特土伯特西藏平以高其倬爲廣西巡撫九月壬申平逆將軍延信以兵送達賴喇嘛入

西藏坐牀富密安兵入烏魯木齊哈西哈回人迎降軍迴至烏蘭烏蘇戊寅雲  
貴總督將陳錫巡撫甘國璧以饋餉後期褫職仍令運米入藏冬十月癸卯上  
還京詔再以河南積穀運往陝西放賑明年河南漕糧照數補還倉穀其餘漕  
糧留貯河南甲辰朝鮮國王李焯薨詔曰李焯襲封五十年奉藩恭謹撫民慈  
愛茲聞溘逝惻悼實深卽令王子李昫襲封所進貢物悉數帶回仍查卹典具  
奏詔陝西甘肅兩省康熙六十年地丁銀一百八十八萬兩零通行蠲免沿邊  
歉收米價昂貴兵力拮据並豫發本年兵餉資進藏官兵甲寅戶部尚書趙申  
喬卒予祭葬諡恭毅丁巳詔撫遠大將軍胤禴會議明年師期戊午以陝西甘  
肅歉收命銀糧兼賑以麥收爲止十一月辛未遣官致祭朝鮮國王李焯特設  
僖順冊封世子李昫爲朝鮮國王戊寅以田從典爲戶部尚書朱軾爲左都御  
史以楊名時爲雲南巡撫辛巳詔大兵入藏其地俱入版圖山川名號番漢異  
同應卽考訂明嚴傳信後世上因與大學士講論河源江源及於禹貢三危庚  
寅以隆科多爲理藩院尚書仍兼步軍統領十二月甲辰廷臣再請行六十年

清 史 稿  
卷一百一十一  
慶賀禮不允壬子授先賢子夏後裔五經博士甲寅以誠親王胤祉子弘晟恒親王胤祺子弘昇爲世子辛酉給祭太廟是歲免直隸江蘇陝西浙江四川等省五十六州縣衛災賦有差朝鮮琉球入貢

六十年辛丑春正月乙亥上以御極六十年遣皇四子胤禛皇十二子胤禔世子弘晟告祭永陵福陵昭陵二月乙未上謁孝莊山陵孝陵孝東陵行告祭禮遣官告祭郊廟社稷乙卯上還京山東鹽徒王美公等作亂捕斬之己未命公策旺諾爾布駐防西藏論取藏功封第巴阿爾布巴康濟爾爲貝子第巴隆布奈爲輔國公三月乙丑羣臣請上萬壽節尊號上不許曰加上尊號乃相沿陋習不過將字面上下轉換以欺不學之君耳本朝家法惟以愛民爲事不以景星慶雲芝草甘露爲瑞亦無封禪改元之舉現今西陲用兵兵久暴露民苦轉輸朕方修省經營之不暇何賀之有庚午賜舉人王蘭生留保進士一體殿試甲戌先是大學士王掇密疏復儲至是御史陶彝任坪范長鄒圖雲陳嘉猷王允晉李允符范允鎬高份高怡趙成穉係紹曾疏請建儲上不悅並挾切責之

命其子詹事王奕清及陶彝等十二人爲額外章京軍前効力夏四月甲午以李麟爲固原提督乙未賜鄧鍾岳等一百六十三人進士及第出身有差丙申詔釐定歷代帝王廟崇祀祀典丁酉命張鵬翮陳鵬年赴山東閱河以賴都爲禮部尙書托賴爲刑部尙書丙午上幸熱河戊午命定西將軍噶爾弼駐藏五月壬戌命撫遠大將軍胤禔移師甘州丙寅台灣奸民朱一貴作亂戕總兵官歐陽凱癸酉以署參將管永寧協副將岳鍾琪爲四川提督乙亥改思明土州歸廣西太平府戊寅詔停本年進兵以常授爲理藩院額外侍郎辦事西寧乙酉以年羹堯爲四川陝西總督賜弓矢發帑金五十萬賑山西陝西命朱軾盧詢董其事六月壬辰改高其位爲江南提督魏經國爲湖廣提督丙申詔曰平逆將軍延信朕之姪也統兵懋從古未到之烟瘴絕域殲滅巨虜平定藏地允稱不辱宗支可封爲輔國公乙卯吐魯番回人拖克拖麻穆克等來歸命散秩大臣阿喇納率兵護之福建水師提督施世驄平台灣擒朱一貴解京詔獎淡水營守備陳策固守功超擢台灣總兵閏六月庚申朔日有食之內寅令刑部

弛輕繫戊辰以噶爾弼爲蒙古都統秋七月己酉上行圍八月甲戌命副都統莊圖率兵二千進駐吐魯番益阿喇衲軍丙戌河決武陟入沁水九月辛卯命副都統穆克登將兵二千赴吐魯番甲午噶爾弼以病能命公策旺諾爾布署定西將軍駐藏以阿寶武格參軍事丙申策旺阿喇布坦犯吐魯番阿喇衲擊走之丙午賑河南山東直隸水災乙卯上還京丙辰命副都御史牛鈕侍講齊蘇勒員外郎馬泰築黃河決口引沁水入運河丁巳以阿喇衲爲協理將軍上製平定西藏碑文冬十月壬戌置巡察台灣御史詔本年秋審俱已詳覽其直省具題緩決之案九卿已加核定朕不忍覆閱恐審求之或致改重也丙寅召撫遠大將軍胤禩來京辛未詔大學士熊賜履服官清正學問博通朕久而弗忘常令周恤其家令其二子來京觀其氣質尙可讀書宜加造就可傳諭九卿知之以鍾世臣爲浙江提督姚堂爲福建水師提督馮毅署廣東提督十一月辛卯以陳鵬年署河道總督戊戌以馬武伊爾哈岱爲蒙古都統己酉上幸南苑詔將軍額倫特侍衛色楞副都統查禮渾提督康泰等殺敵殉國俱賜卹十

二月壬申四川提督岳鍾琪征郭羅克番人平之丁丑上還駐暢春園遣鄂海永泰往視吐魯番屯田是歲免江南河南陝西甘肅福建浙江湖廣等省一百二十三州縣災賦有差朝鮮琉球安南入貢丁戶二千九百一十四萬八千三百五十九又永不加賦後滋生人丁四十六萬七千八百五十徵銀二千八百七十九萬零鹽課銀三百七十七萬二千三百六十三兩零鑄錢四萬三千七百三十二萬五千八百有奇

六十一年壬寅春正月戊子召八旗文武大臣年六十五以上者六百八十人已退者咸與賜宴宗室授爵勸飲越三日宴漢官年六十五以上三百四十人亦如之上賦詩諸臣屬和題曰千叟宴詩戊申上巡幸畿甸二月庚午以高其倬署雲南貴州總督丙子上還駐暢春園三月丙戌以阿魯爲荊州將軍夏四月甲子遣使封朝鮮國王李昫弟吟爲世弟丁卯上巡幸熱河己巳撫遠大將軍胤勳復蒞軍癸未福州駐防兵譚將軍黃秉銀不能約束褫職斬爲首者五月戊戌施世倫卒以張大有著漕運總督六月以奉天連歲豐稔弛海禁遼羅

米賤聽入內地免其稅辛未命直隸截漕二十萬石備賑丙子趙宏燮卒以其  
兄子郎中趙之垣加僉都御史銜署直隸巡撫秋七月丁酉征西將軍祁里德  
上言烏蘭古木屯田事宜請益兵防守命都統圖拉率兵赴之壬寅命色爾圖  
赴西藏統四川防兵戊申以蔡珽爲四川巡撫子故直隸總督趙宏燮祭葬設  
齋敏八月丙寅停今年決囚故提督藍理妻子先以有罪入旗至是上念平台  
灣功賞還原籍交欵免追己卯上駐蹕汗特木爾達巴漢昂阿賜來朝外藩銀  
幣鞍馬隨圍軍士銀幣九月甲申上駐熱河乙酉諭大學士曰有人謂朕塞外  
行圍勞苦軍士不知承平日久豈可遂忘武備軍旅數興師武臣力克底有功  
此皆勤於訓練之所致也甲午年羹堯噶什圖請量加火耗以補有司虧帑上  
曰火耗只可議減豈可加增此次虧空多由用兵官兵過境或有餽助其始挪  
用公款久之遂成虧空昔年曾有寬免之旨現在軍需正急即將戶部庫帑撥  
送西安備用戊戌上迴鑾丁未次密雲閱河隄庚戌上還京冬十月辛酉命雍  
親王胤禛弘昇延信孫渣齊隆科多查弼納吳爾占察視倉廩壬戌以覺羅德

爾金爲蒙古都統安齡爲杭州將軍辛未以查弼納爲江南江西總督癸酉上幸南苑行圍以李樹德爲福州將軍黃國材爲福建巡撫十一月戊子上不豫還駐暢春園以貝子胤禩輔國公吳爾占爲滿洲都統庚寅命皇四子胤禛恭代祀天甲午上大漸日加戊上崩年六十九卽夕移入大內發喪雍正元年二月恭上尊諡九月丁丑葬景陵

論曰聖祖仁孝性成智勇天錫早承大業勤政愛民經文緯武寰宇一統雖曰守成實同開創焉聖學高深崇儒重道幾暇格物豁貫天人尤爲古今所未覩而久道化成風移俗易天下和樂克致太平其雍熙景象使後世想望流連至於今不能已傳曰爲人君止於仁又曰道盛德至善民之不能忘於戲何其盛歟



清史稿

本紀九

世宗本紀

世宗敬天昌運建中表正文武英明寬仁信毅睿聖大孝至誠憲皇帝諱胤禛  
聖祖第四子也母孝恭仁皇后烏雅氏生有異徵天表魁偉舉止端凝康熙三  
十七年封貝勒四十八年封雍親王六十一年十一月聖祖在暢春園不豫命  
代祀園丘甲午聖祖大漸召於齋宮宣詔嗣位聖祖崩辛丑上即位以明年爲  
雍正元年命貝勒胤禛皇十三弟胤祥大學士馬齊尙書隆科多總理事務召  
撫遠大將軍胤禩來京命兵部尙書白潢協理大學士以楊宗仁爲湖廣總督  
年希堯署廣東巡撫十二月戊午停止直省貢獻方物壬戌封貝勒胤禛爲廉  
親王胤祥爲怡親王胤禩爲履郡王廢太子胤礽之子弘皙爲理郡王更定歷  
代帝王廟祀典癸亥詔古今圖書集成一書尙未竣事宜速舉淵通之士編輯  
成書以輔國公延信爲西安將軍署撫遠大將軍事甲子詔直省倉庫虧空限  
三年補足逾限治罪命富寧安爲大學士隆科多爲吏部尙書廉親王胤禛管

理藩院尙書事壬申以張廷玉爲禮部尙書予大學士馬齊二等伯爵賜名敦  
惠

雍正元年癸卯春正月辛巳朔頒詔訓飭督撫提鎮文吏至於守令武將至於  
參游凡十一道丙戌時享太廟辛卯祈穀於上帝壬寅頒賜提鎮副將大行遣  
念弓矢橐鞬刑部尙書陶賴張廷樞坐審訊陳夢雷一案釋其二子降官甲辰  
封淳郡王長子弘春爲貝子乙巳大學士王揆乞休允之二月辛亥朔以佛格  
勵廷儀爲刑部尙書壬子以張鵬翮爲大學士乙卯以皇十六弟胤祿出嗣莊  
親王博果鐸襲其爵以博果鐸之姪球琳爲貝勒庚申訓飭貝子胤禔乙丑封  
輔國公延信爲貝子定部院書吏考滿回籍聽選例勅科道官每日一人具摺  
奏事辛未以宜兆熊爲福州將軍趙之垣免以李維鈞爲直隸巡撫己卯副將  
軍阿喇衲奏羅卜腦兒回人投順三月甲申罷西藏防兵戊察木多加隆科多  
馬齊年羹堯太保命督撫疏薦幕賓封年羹堯三等公壬辰命故安和親王岳  
樂之孫吳爾占色亨圖經希及其子移居盛京除屬籍夏四月辛亥大行梓宮

奉安鑾殿命貝子胤禩留護丙辰命怡親王胤祥總理戶部封其子弘昌爲貝子設鄉會試繙譯科乙丑復置起居注官封皇十七弟胤禮爲果郡王丁卯初御乾清門聽政制詔訓飭大學士領侍衛內大臣文武大臣凡三道丙子嘗封淳郡王胤祐爲親王勅總兵官具摺言事五月庚辰詔免雲南入藏兵丁應補倒斃馬匹癸卯御太和殿視朝李維鈞請以州縣歲入彌補積虧上曰州縣官令少從容方可責之盡心興舉豈可勒爲他人補虧缺耶乙酉勅理郡王弘皙移住鄭家莊丁酉命尙書徐元夢署大學士辛丑仁壽皇太后崩帝之生母也奉安梓宮於寧壽宮封貝子胤禩爲恂郡王六月丁巳以左世永爲漢軍都統己未加封孔子五世王爵辛酉命八旗無恒產者移居熱河墾田壬戌青海郡王額爾得尼爲羅卜藏丹津所破率屬來投遣官撫之其姪噶爾丹達錫續來歸附命同居於蘇油壬申勅李維鈞畿甸之內旗民雜處旗人暴橫頗苦小民爾當整飭不必避忌旗漢形迹畏懼王公勳戚皆密奏以聞丙子勅八旗人員有爲本旗都統本管王公刁難苛索者許其控訴秋七月己卯命侍郎常壽諭

和羅卜藏丹津乙酉遣官赴盛京江西湖廣糶米運京己丑詔免江西漕糧腳  
耗運費誤追者壬辰改國語固山額眞爲固山昂邦伊都額眞爲伊都章京辛  
巳停本年秋決除紹興惰民丐籍頒行孝經衍義壬寅命隆科多王碩齡監修  
明史徐元夢張廷玉爲總裁八月丁巳以楊琳爲廣東總督孔毓珣爲廣西總  
督甲子召王大臣九卿面諭之曰建儲一事理宜夙定去年十一月之事倉卒  
之間一言而定聖祖神聖非朕所及今朕親寫密封緘置錦匣藏於正大光明  
匾額之後諸卿其識之庚午常壽疏報行抵青海諭和羅卜藏丹津不從詔年  
羹堯備兵辛未上謁陵九月丁丑朔葬聖祖仁皇帝於景陵孝恭皇后祔焉是  
日五色雲見己卯上還京辛巳以郝玉麟爲雲南提督壬午以張廷玉爲戶部  
尙書張伯行爲禮部尙書癸巳以裕親王保泰管鑲黃旗事務命纂修律例丙  
申以阿喇衲爲蒙古都統冬十月戊申勅授年羹堯撫遠大將軍改延信爲平  
逆將軍癸亥羅卜藏丹津執我使臣常壽筆帖式多爾濟死之癸酉以阿爾松  
阿爲禮部尙書尹秦爲左都御史十一月丁丑賜于振等二百四十六人進士

及第出身有差戊寅羅卜藏丹津入寇西甯守備馬有仁參將宋可進敗之於申中堡賊遁內戌年羹堯奏總兵楊盡信進剿番賊於莊浪椅子山斬賊數百得旨嘉獎辛丑冬至祀天於圓丘奉聖祖仁皇帝配享十二月丙午朔以吳爾占等怨望不准承襲安郡王並撤所屬佐領辛酉年羹堯奏賊人來犯參將孫繼宗擊敗之安插洋人於澳門改天主堂爲公所嚴禁入教丁卯册嬭妃那拉氏爲皇后封年氏爲貴妃鈕祜祿氏爲熹妃耿氏爲裕嬪甲戌禘祭太廟是歲免直隸江南等省四十九州縣災賦有差朝鮮琉球入貢丁戶二千五百三十二萬六千二百七十又永不加賦後滋生人丁四十八萬五百五十七田賦徵銀三千二十二萬三千九百四十三兩有奇鹽課銀四百二十六萬一千九百三十三兩有奇鑄錢四十九萬九千二百有奇

二年甲辰春正月辛巳祈穀於上帝奉聖祖仁皇帝配享詔大學士圖海配享太廟常壽自羅卜藏丹津處回命監禁西安丁亥命岳鍾琪爲奮威將軍專征青海丁酉以高其佩爲漢軍都統庚子建孔子廟於歸化城二月丙午御製聖

諭廣訓頒行天下戊午岳鍾琪兵至青海擒阿爾布坦溫布等三虜收撫逃散  
部落詔以青海軍事將竣策旺阿拉布坦恭順罷阿爾泰及烏蘭古木兵辛酉  
詔臨雍大典改幸學爲詣學癸亥上耕藉田三推畢復加一推甲子勅州縣舉  
老農予頂戴年羹堯奏涼莊道蔣淵勳平阿岡部落加按察使銜丙寅高其倬  
奏中甸番夷就撫庚午上祈雨於黑龍潭三月乙亥朔上詣太學釋奠御彝倫  
堂講尙書大學廣太學鄉試中額丁丑祭歷代帝王廟庚辰上謁陵岳鍾琪師  
抵賊巢羅卜藏丹津遁獲其母阿爾泰喀屯青海平封年羹堯一等公岳鍾琪  
三等公發帑金二十萬犒軍乙酉清明節上詣景陵行數土禮丁亥還宮夏四  
月丁未以孔毓珣爲兩廣總督李紱爲廣西巡撫庚戌召王大臣訓飭廉親王  
胤禩令其改行並令王大臣察其善惡據實奏聞己巳敦郡王胤禩有罪削爵  
拘禁閏四月丁丑續修會典丙戌以嵇曾筠爲河道副總督丁酉以蘇丹爲蒙  
古都統癸未青海叛虜阿爾布坦溫布吹拉克諾木齊藏巴扎布械繫至京上  
御午門受俘五月癸卯朔夏至祭地於方澤奉聖祖仁皇帝配享貝勒布蘭復

降爲輔國公丙辰貝子蘇努坐廉親王黨削爵並其子俱發右衛辛酉詔川陝湖廣雲貴督撫提鎮朕聞各處土司鮮知法紀苛待屬人生殺任性方今海宇樂利而土民獨切向隅朕心不忍宜嚴飭土司勿得肆爲殘暴以副朕子惠元元至意壬戌以那敏爲滿洲都統戊辰貝子弘春削爵六月癸未勅八旗勿擅毆死家人乙酉以青海平定勅石太學戊戌上以闕里廟災致祭先師遣官監修降貝子胤禩爲鎮國公李光復能以李永紹爲工部尙書秋七月丁巳御製朋黨論頒示諸臣壬戌以丁壽爲阿爾泰駐防將軍癸亥副將軍阿喇衲卒於軍上念其久勞於外加予世職八月甲戌命鄉會試迴避士子一體考試別派大臣閱取壬午停本年秋決庚寅以田文鏡署河南巡撫九月辛丑朔以阿爾泰軍功予丁壽世職停戶部捐納事例甲寅命山西丁銀攤入地糧徵收其後各省以漸行之冬十月乙亥賜陳德華等二百九十九人進士及第出身有差戊寅封明裔朱之璉爲一等侯世奉明祀癸未詔京師建忠義祠乙未詔厄魯特郡王額駙阿寶賜往青海遊牧設審夏駐防內申刑部尙書阿爾松阿以無

心効力奪職削爵發往盛京以其伯音德襲果毅公暹羅國貢稻種果樹設直隸布政司按察司以巡撫李維鈞爲總督庚子以音德夸岱俱爲領侍衛內大臣丁未以蘇丹爲寧夏將軍十一月庚戌弘晟有罪削爵乙卯以綽奇爲蒙古都統噶爾弼爲漢軍都統丁巳高其倬奏官兵進勦狝苗平之辛酉定稱孝莊文皇后山陵爲昭西陵十二月癸酉命太學立進士題名碑癸未廢太子胤礽薨封理親王諡曰密以綽奇爲奉天將軍己丑裕親王保泰有罪削爵以其弟子廣寧襲封裕親王設湖南學政戊戌給祭太廟是歲免江南浙江等省五十七州縣衛災賦有差朝鮮安南暹羅入貢

三年乙巳春正月癸丑詔以固安官地二百頃爲井田道八旗閑散受耕壬戌以蔡珽爲左都御史癸亥以阿齊圖爲步軍統領二月庚午日月合璧五星聯珠庚辰上以三年服闋行給祭禮丁亥詔責年羹堯未能撫卹青海殘部倘有一二人逃入準噶爾者必重罪之乙未鄂倫岱坐廉親王黨奪職削爵發往盛京以其弟夸岱襲一等公丁酉召廷臣宣示胤禩胤禛胤禵胤禔胤禩胤禵三



月丁未以馬會伯爲貴州提督策旺阿拉布坦遣使入貢設安徽學政癸丑大學士張綱嗣卒禮部尚書張伯行卒丁巳蘇蘇松浮糧四十五萬兩滿保奏台澎生番七十四社歸化辛酉年羹堯表賀日月合璧五星聯珠將朝乾夕惕寫作夕惕朝乾詔切責之曰年羹堯非粗心者是直不以朝乾夕惕許朕耳則年羹堯青海之功亦在朕許與不許之間未可知也顯係不敬其明白迺奏乙丑敘總理王大臣怡親王胤祥子一子郡王隆科多馬齊加予世職廉親王胤禩不與並嚴詔訓責之夏四月己卯調年羹堯爲杭州將軍以岳鍾琪爲川陝總督遣學士衆佛保副都統查吏往準噶爾定界以董吉那爲江甯將軍辛卯以田從典爲大學士五月癸亥以左都御史尹泰爲盛京禮部侍郎兼理奉天府尹六月癸酉詔年羹堯之子年富年興隆科多之子玉柱俱褫職乙亥命上三旗世職及登城巴圖魯之子二十以下十四以上揀選引見錄用削年羹堯太保褫其一等公秋七月丁未削隆科多太保壬戌大學士白潢能以高其位爲大學士張廷玉著大學士命隆科多往阿蘭山修城壬戌杭州將軍年羹堯

黜爲閑散旅員癸亥貝子胤禔有罪削爵八月辛未李維鈞以黨年羹堯逮鞫以李紱爲直隸總督壬辰上駐回明園加怡親王胤祥俸果郡王胤禮護衛九月甲寅以朱軾爲大學士改蔡瑁爲吏部尙書仍管兵部都察院事丙辰逮繫年羹堯下刑部冬十月戊辰命巡撫不與總督同城者參劾屬員自行審結丙子封恒親王胤祺子弘晳輔國公庚寅以楊名時爲雲貴總督管巡撫事鄂爾泰爲雲南巡撫管總督事十一月庚子上謁陵戊申還宮癸亥以噶爾弼爲奉天將軍十二月丁卯降郡王胤禔爲貝子甲戌廷臣議上年羹堯罪九十二款得旨年羹堯賜死其子年富立斬餘子充軍免其父兄緣坐辛巳汪景祺以謗訕處斬癸未以覺羅巴延德爲天津水師營都統壬辰禘祭太廟是歲免直隸江蘇河南浙江廣東等省二十七州縣災賦有差朝鮮琉球西洋國入貢

四年丙午春正月甲午上御太和殿受朝賀朝正外藩依先朝例賞子銀幣丁酉宣詔罪狀皇九弟胤禔戊戌集廷臣宣詔罪狀皇八弟胤禩易親王爲民王褫黃帶絕屬籍革其婦烏雅氏福晉逐回母家復革民王拘禁宗人府勅令易

名名曰阿其那名其子弘旺曰菩薩保甲寅削降科多職仍令赴鄂羅斯議界  
乙卯贈故尙書顧八代太傅諡文端上之授讀師也二月甲子以孫柱爲吏部  
尙書兼管兵部以法海爲兵部尙書福敏爲左都御史貝子魯賓鎮國公永謙  
俱以議胤禩依違削爵尋起魯賓爲輔國公大學士朱軾有母喪賜白金四  
千疋葬事乙酉簡親王雅爾江阿削爵以其弟神保住襲封庚寅以張廷玉爲  
大學士蔣廷錫爲戶部尙書以申穆德爲右衛將軍三月丁丑命丁壽屯兵特  
斯備策旺阿拉布坦壬戌侍講錢名士投詩年羹堯事發革去職銜上親書名  
教罪人四字懸其門並令文臣作爲文詩刺惡之夏四月己卯以范時繹爲兩  
江總督五月癸巳禁錮皇十四弟胤禩及其子白起於起於壽皇殿側以子白  
敦爲輔國公誅鄂倫岱阿爾松阿於戌所乙巳改胤禩名爲塞思黑拘於保定  
己酉命順承郡王錫保食親王俸封皇十五弟胤禛爲貝勒皇二十弟胤禛爲  
貝子六月癸亥以輔國公巴賽爲振武將軍備邊乙丑以查弼納爲兵部尙書  
秋七月癸巳釋回軍前御史陶彝等十三人辛亥命蔡珽專管都統以查弼納

楊名時爲吏部尙書平郡王納爾素有罪削爵以其子福彭襲封八月丙寅停  
本年秋決丁亥李紱奏塞思黑卒於保定九月壬辰以宜兆熊爲湖廣總督尋  
命福敏代之以蔡良爲福州將軍貝子滿都護降爲輔國公撤出佐領丁酉輔  
國公阿布蘭以違例謝恩削爵撤出佐領戊戌重九節上御乾清宮賜宴廷臣  
賦柏梁體詩己亥錫保奏阿其那卒於禁所癸丑起復大學士朱軾在內閣行  
走乙卯侍郎查嗣庭以謗訕下獄冬十月甲子設浙江觀風整俗使命鄉試五  
經取中之副榜及兩次取中副榜准作舉人戊辰詔廷臣皇考臨御六十餘年  
躬節行儉宮廷地毯用至三四十年猶然整潔服御之物一惟質樸絕少珍奇  
昨檢點舊器及取回避暑山莊陳設思慕盛德實無終已用特書此以詔我子  
孫辛巳裕親王廣寧削爵永錮宗人府甲申以普雄苗地界連川滇命川陝總  
督移駐成都以鄂爾泰爲雲貴總督憲德爲湖北巡撫丙戌琉球國謝賜匾額  
貢方物十一月己亥大學士高其位罷壬子敍富寧安久戌功封一等侯乙卯  
詔浙江士習敝壞上爲懷挾停其鄉會試十二月庚申王大臣請將阿其那塞

思黑妻子正法諭曰阿其那塞思黑雖大逆不道而反叛事蹟未彰免其緣坐塞思黑之妻遂回母家禁錮其餘眷屬交內務府養贍辛酉命河南陝西四川均攤丁銀入地併徵乙丑御史謝濟世疏劾田文鏡十罪詔褫職遣戍壬申鄂爾泰奏勦辦狝苗就撫者二十一寨查出熟地荒地三萬餘畝壬午以李紱爲工部右侍郎以宜兆熊爲直隸總督劉師恕協辦以毛文銓爲京口將軍丙戌哈祭太廟是歲免直隸山東安徽江西湖廣等省六十三州縣衛災賦有差朝鮮琉球蘇祿入貢

五年丁未春正月戊子朔時享太廟壬寅赦年癸堯之子之戍邊者甲辰王大臣奏黃河清請朝賀上不許加文武官一級勅八旗交納銅器三年限滿隱匿者罪之乙巳以孫柱署大學士丙辰以沈近思爲左都御史兼吏部侍郎二月丁卯上謁陵甲辰廣州駐防兵丁滋事將軍李杅以徇庇論死甲戌上還京甲申上御經筵丙戌命李紱往廣西擒捕逸犯羅文綱文綱自投來歸三月庚寅勅本年會試於三月舉行給與蓋湯木炭以廣祿襲裕親王戊戌上宣示蔡珽

罪狀下刑部拘訊辛丑開闢省洋禁丙午鄂羅斯察罕汗遣使臣薩瓦表賀登極進貢方物賞賚如例內大臣馬武卒大學士高其位卒閏三月乙丑揀選下第舉人分發直省以州縣用戊辰以宜兆熊爲吏部尙書邁柱爲湖廣總督癸酉烏蒙鎮雄兩土府改設流官己卯以覺羅伊禮布爲奉天將軍常壽爲江甯將軍丙戌弘昇有罪削爵夏四月戊子吐魯番回酋請進貢不許爲己撤兵又以其地許策旺阿拉布坦也以福敏爲吏部尙書黃國材署兵部尙書辛卯賜彭啟豐等二百二十六人進士及第出身有差癸巳命州縣會學官舉優行生乙巳設宗室御史二員五月戊午以拉錫爲滿洲都統查嗣庭死於獄戮其屍乙亥叙烏蒙鎮雄功子鄂爾泰世職六月庚子移盛京副都統一員駐錦州設熊岳副都統封誠親王胤祉子弘景爲鎮國公隆科多以罪削爵以其弟慶復襲一等公秋七月乙卯以富寧安爲漢軍都統己未李永紹罷以黃國材爲工部尙書加田文鏡尙書爲河南總督己巳以夸岱爲工部尙書丙子晉封輔國公弘睦鄂齊熙良爲鎮國公己革貝勒蘇努塗抹聖祖硃諭經王大臣刑部參

奏得旨蘇努怙惡不悛竟令其子蘇爾金庫爾陳烏爾陳信從西洋之教諭令  
悛改伊竟抗稱願甘正法不能改教今又查出昔年聖祖硃批奏摺敢於狂書  
塗抹見者髮指即應照大逆律概行正法但伊子孫多至四十人悉行正法則  
有所不忍倘分別去留又何從分別暫免其死仍照前禁錮八月己丑上御經  
筵庚寅賴都能以常壽爲禮部尙書癸卯追封故平南大將軍賴塔爲一等公  
其孫博爾屯襲乙巳喀爾喀郡王額駙策凌與鄂羅斯使臣薩瓦定界以恰克  
圖爲貿易之所理藩院派員管理九月丙寅定官員頂戴之制以孫柱爲大學  
士查弼納爲兵部尙書己巳鄂爾泰奏花苗內附勦辦蕘蕘平之威遠探苗內  
附戊寅刑部議上蔡珽獄大罪十八應立斬妻子入辛者庫得旨改監候冬十  
月乙酉命科道及吏部司官不必專用科目丁亥王大臣會審隆科多獄上大  
罪五十應斬立決妻子入辛者庫財產入官得旨隆科多著禁錮以博爾屯爲  
蒙古都統十一月癸丑命查郎阿邁祿備邊丁巳加浙江巡撫李衛爲總督丁  
卯復熬拜一等公令其孫達福襲勅修執中成憲戊辰鄂爾泰奏貴州長寨後

路克猛等一百八十四寨生苗內附乙亥守護景陵大學士蕭永藻坐失察公  
銜廣善越分請安襪職仍依前守陵庚辰遣官清丈四川地畝順承郡王錫保  
以徇庇延信奪親王俸仍停郡王俸三年十二月壬午朔以那蘇圖爲黑龍江  
將軍乙酉命直省學政每六年拔取生員一次王大臣審擬貝勒延信大罪二  
十應斬決得旨延信免死與隆科多一處監禁辛丑范時繹奏太倉州屬之七  
浦士民願自行修濬上不許曰民間之生計卽國計也國用不敷之時不得不  
藉資民力方今國用充裕仍發帑銀給之戊戌左都御史沈近思卒壬寅以唐  
執玉爲左都御史庚戌給祭太廟是歲免直隸江蘇江西浙江福建湖廣廣東  
等省三十四州縣災賦有差朝鮮鄂羅斯入貢

六年戊申春正月己未高其倬疏陳閩省械鬪情形得旨此等處須鼓舞屬員  
實心盡力方能有濟設遇一二有爲者甫欲整理輒目爲多事屬員窺見其隱  
誰肯任怨向前須知其難而終任之二三年後始有成效也乙丑晉封貝勒球  
琳爲惠郡王鎮國公弘春爲貝子己卯命杭奕祿任蘭枝使安南二月丙戌晉



封果郡王胤禮爲親王癸巳上御經筵庚子以來文爲江甯將軍壬寅賜歸流  
永順土司彭肇槐世職并白金萬兩庚戌以嵇曾筠爲兵部尙書仍辦河工三  
月丁巳大學士田從典罷以蔣廷錫爲大學士庚午以進藏官兵駐劄西甯命  
巡撫杭奕祿督之夏四月甲申以陳泰爲滿州都統予告大學士田從典卒癸  
卯以查郎阿稽曾筠爲吏部尙書壬寅詔地方官私徵耗羨難以裁革惟在督  
撫審慎用之不可以歸公若歸公則地方官又重複取民矣五月癸丑以郭銜  
爲廣西巡撫鄂爾泰奏勦辦東川逆苗祿天祐祿世豪平之壬戌詔八法內年  
老一條義有未盡凡年老而能辦事者勿入八法丁卯創富甯安侯爵仍爲大  
學士命馬爾賽在大學士內辦事乙亥以田文鏡爲河東總督兼轄山東以耿  
化祚爲漢軍都統六月庚辰詔六部員外郎主事作爲公缺勿庸按旗升轉癸  
未置先賢仲弓後裔五經博士丙戌以蔡良爲廣州將軍石禮哈爲福州將軍  
尹繼善協辦江南河工癸巳以張廣泗爲貴州巡撫岳濬署山東巡撫己亥誠  
親王胤祉有罪降郡王拘其子弘晟於宗人府封理密親王子弘曠爲輔國公

秋七月辛亥命李衛兼理江蘇緝捕戊午鄂爾泰奏遣兵勦平川境米貼逆苗命以其事屬四川提督黃廷桂辛酉岳鍾琪奏頗羅鼐兵至西藏喇嘛擒獻阿爾布巴隆布奈扎爾鼐等西藏平戊辰以紀成斌爲固原提督壬申大學士富寧安卒賜故大學士寧完我三世孫甯蘭驍騎校房一所銀五百四世孫甯邦璽拜唐阿八月甲申上御經筵以尹繼善署江蘇巡撫乙酉改湖廣桑植保靖二土司爲流官以馬爾賽爲大學士甲午以祖秉衡爲京口將軍丁未詔復浙江鄉會試九月癸丑命八旗勳舊子孫有犯法虧帑者察實以聞漢員中陣亡盡節及居官清正之子孫同此察報天津水師營都統公鄂齊以失察兵丁傷官削爵降三等侍衛丁卯查郎阿奏領兵至藏會同副都統馬喇學士僧格訊明逆首阿爾布等立時正法餘衆處置訖冬十月丁亥以鄂爾泰勦平廣西八達寨逆苗兼督雲貴廣西三省發帑銀十萬犒滇黔兵辛卯發內帑九十四萬代西征軍士賠償追款以石文焯爲禮部尙書路振揚爲兵部尙書乙未岳鍾琪奏建昌喇汝窩番賊作亂討平之詔湖廣土司甚多供職輸將與流官無異

該督撫勿得輕議改流以蔡仕勳爲浙江觀風整俗使癸巳諭停諸王管理旗務十一月丙辰設咸安宮官學包衣子弟肄業庚申停本年決囚戊辰江西巡撫布蘭泰以不職免添設欽天監西洋人監副一十二月甲午免四川崇慶州七年額賦丙申大清律集解附例成丁酉以定藏功封頗羅鼐爲貝子理後藏事揀選噶隆二人理前藏事實其兵丁銀三萬兩庚子命侍郎王瓊彭維新往江南清查通賦甲辰禘祭太廟是歲免直隸江南陝西四川等省二十六州縣災賦有差朝鮮入貢

七年己酉春正月辛亥鄂爾泰奏萬壽節日雲南慶雲見命宣付史館丁巳命陳元龍尹泰爲大學士壬申復蒙古恩格德爾侯爵爲三等公以其曾孫噶爾薩襲蒙古二等伯明安晉封一等侯令其孫馬蘭泰襲壬申都統伯四格有罪監禁上念其祖莽固爾岱之功釋之癸酉命侍郎法保等察修直隸至江南大道二月丁丑命出征官兵行糧外仍給坐糧以尹繼善爲河道總督戊寅以多索禮爲奉天將軍甲申上謁陵庚寅還京設直隸巡農御史己亥命怡親王等

查八旗世職有以絕嗣除爵者許以族人紹封乙未上御經筵以李杅爲漢軍都統獨浙江本年額賦六十萬兩三月乙巳朔以孔毓珂爲江南河道總督郝玉麟爲廣東總督岳鍾琪奏勦平雷波叛苗一百餘寨戊申鄂爾泰奏勦平丹江九股等處生苗獨河南本年額賦四十萬兩辛亥以嵇曾筠爲河南山東總督丙申上以準噶爾噶爾丹策零稔惡藏奸終爲邊患命傅爾丹爲靖邊大將軍北路出師岳鍾琪爲寄遠大將軍西路出師征討準噶爾甲子以鄂善莽鵠立俱爲蒙古都統辛酉詔公巴遜爲副將軍順承郡王錫保爲振武將軍陳泰袞泰石禮哈岱豪達福海蘭爲參贊旗兵六千三省兵八千蒙古兵八百歸北路駐紮阿爾泰總兵官魏麟閔文繼領車騎營兵八千赴西路布爾庫夏四月甲午以查郎阿署川陝總督史貽直署福建總督勅建雲兩風雷壇廟四川天全土司改流設州高其倬劾海澄公黃應纘行賄承襲應革職銜詔寬免之五月戊午湖南保靖桑植永順三土司改流設府縣甲子令漕船順帶商貨於舊例六十石外許至百石乙丑先是岳鍾琪疏言有湖南人張熙投遞逆書訊由

其師曾靜所使命提督張熙至京九卿會訊曾靜供因讀已故呂留良所著書陷溺狂悖至是明詔斥責呂留良並令中外臣工議罪六月己卯以唐執玉署直隸總督乙酉以甘肅四川雲南貴州廣西轉輸勞費免庚戌全年額賦陝西免十分之三秋七月丙午貴州都勻生苗及獯仲生苗內附甲寅以果親王胤禮管工部莊親王胤祿管滿洲都統己巳減暹羅國貢賦閏七月乙酉以阿里袞爲杭州將軍八月癸卯以王鈺爲京口將軍己酉上御經筵九月戊子改廣西鎮安爲流冬十月庚戌賜漢大臣子蔣溥等十三人舉人甲子詔曰江南清查逋賦一案歷降諭旨甚明重在分別官侵民欠乃派往之員辦理不善有以紳衿帶徵之項指爲官侵者有吏書侵蝕之項議令富戶攤賠者又有將帶征錢糧加增火耗者甚且以停征之項概令征收者惠民之政轉而擾民豈非司其事者之咎乎其恪遵前旨妥辦倘再犯諸弊從重治罪戊辰以內外諸臣勤慎奉職加怡親王儀仗一倍張廷玉少保將廷錫太子太傅勵廷儀太子少傅傅爾丹岳鍾琪鄂爾泰俱少保田文鏡太子太傅李衛查郎阿席伯俱太子

少保十一月甲戌發帑金百萬兩修高家堰石工以馬曾伯爲兵部尙書仍留軍前戊寅免功臣子孫施世驊等贓銀五十餘萬以內庫銀撥補其應得遣戍監追籍沒及妻子入官等罪咸赦除之戊子停本年決囚十二月戊申設廣東觀風整俗使及肇高學政戊辰給祭太廟是歲免江南江西浙江福建湖南雲南甘肅等省二十四州縣災賦有差朝鮮琉球入貢

八年庚戌春正月丁丑以總理陵寢事務領侍衛內大臣尙崇廩爲盛京五部尙書以那蘇圖爲奉天將軍常德爲寧古塔將軍卓爾海爲黑龍江將軍以慶復爲漢軍都統甲午景陵瑞芝生丁酉唐執玉奏正月二十日鳳凰見於房山得旨此事已據府尹孫家淦奏報又據尙崇廩報稱天台中見一神鳥高五六尺毛羽如錦羣鳥環繞向北飛去朕躬德薄未足致此上瑞發圖子監膏火銀六千兩歲以爲常二月庚子朔定外戚錫爵曰承恩公甲辰上御經筵己酉復賴士公爵丁巳復誠郡王胤祉爲誠親王貝勒胤禩爲愉郡王貝子胤禛爲貝勒皇二十一弟胤禧皇二十二弟胤祐爲貝子皇二十三弟胤祁爲鎮國公

戊辰南掌國遣使來貢請定貢期上優詔答之命五年一貢三月丁亥命張廷玉蔣廷錫管理三庫事務甲午以史貽直署兩江總督頒行聖祖御纂書經傳說上製序文夏四月遣親王胤祐薨諡曰度以子弘曠襲郡王癸卯賜周澍等三百九十九人進士及第出身有差丁未定大學士爲正一品左都御史爲從一品癸亥以嵇曾筠署江南河道總督田文鏡兼理東河總督五月辛未怡親王胤祥薨上痛悼之親臨其喪諡曰賢配享太廟丁丑噶爾丹策零遣使通問命暫緩師期召傅爾丹岳鍾琪來京移高其倬爲兩江總督劉世明爲福建總督壬午上再臨怡賢親王喪詔曰朕諸兄弟之名皆皇考所賜即位之初胤祉援例陳請更改上一字奏明母后勉強行之今怡親王薨逝王名仍書原字誌朕思念辛卯先是誠親王胤祉會怡賢親王之喪遲到早散面無戚容交宗人府議處至是議上請削爵正法得旨削爵拘禁癸巳以岳超龍爲湖廣提督乙未晉封貝子胤禛爲貝勒理郡王弘皙爲親王公弘景爲貝勒復胤禩郡王六月戊戌朔日有食之壬寅賜怡賢親王忠敬誠直勤慎廉明八字加於諡上戊

申鄂爾泰奏黎平都勻生苗內附癸亥馬會伯免以唐執玉爲兵部尙書史貽直爲左都御史秋七月戊寅命建賢良祠壬辰遣官賑江南湖南直隸山東等處被水災民癸巳命巡撫班次在副都統之上八月丙午以山東被水較重特免通省漕糧辛亥命怡賢親王子弘曉襲封親王弘皎別封郡王均世襲乙卯京師地震康親王崇安停管宗人府事以裕親王廣祿管宗人府九月丁卯以京師地震賜百官牛俸賜八旗銀各三萬兩乙酉以高其倬相視太平峪吉地予世職辛卯鄂爾泰奏猛弄白氏孟懿子內附冬十月庚子再定百官帽頂一品官珊瑚頂二品官起花珊瑚頂三品官藍色明玻璃頂四品官青金石頂五品官水晶頂六品官硨磲頂七品官素金頂八品官起花金頂九品未入流起花銀頂辛亥命查弼納爲副將軍往北路軍管壬子鄂爾泰奏恢復烏蒙府城苗黨平甲寅以馬爾賽張廷玉蔣廷錫久參機務各予伯爵世襲闕里文廟成命皇五子弘晝瀘郡王弘曠前往告祭十一月己巳設孔廟執事官乙亥命各省落地稅契稅勿苛索求盈丙子明詔申飭漢軍勦裔獲咎大員范時繹尙宗



廣李永隆等戊子勅各省解部銀兩留其半以充公用十二月丁酉命傅爾丹岳鍾琪各回本軍乙卯紀成斌奏準噶爾賊衆犯闕舍圖卡倫總兵樊廷擊敗之子樊廷世職銀一萬兩其張朝佐等並予世職賞銀有差是歲免直隸江南山西湖南貴州等省十八州縣衛災賦又免直隸江南山東河南漕糧各有差朝鮮安南南掌入貢

九年辛亥春正月庚寅詔撥揚州鹽義倉積穀二十萬石加賑上年邳宿被水災民二月乙未愉郡王胤禩薨諡曰恪子弘慶襲郡王撥通倉米十五萬石奉天米二十萬石採買米五萬石運往山東備賑戊戌命常賚爲鎮安將軍率甘涼兵駐安西戊午以田文鏡年老多病命侍郎王國棟前往河南賑濟被水災民壬戌專設四川總督以黃廷桂補授三月乙酉以三泰爲禮部尙書鄂爾奇爲左都御史戊子命揀選八旗家人二千以伊禮布統之爲西路副將軍夏四月庚子命史貽直杭奕祿前往陝西宣諭化導丙辰鄂彌達奏瓊山儋州生黎內附五月甲子以石雲倬爲西路副將軍命趙之垣馬龍督運西路糧餉六月

丙午傅爾丹奏準噶爾入寇扎克賽河率兵迎擊辛亥岳鍾琪奏準噶爾犯吐魯番率兵赴援賊遁留兵屯戊寅上所兩是日兩秋七月丁卯召鄂爾泰來京以高其倬爲雲貴總督尹繼善爲兩江總督己巳黃廷桂奏瞻對番賊作亂遣兵勦平之癸酉傅爾丹奏官兵進擊準噶爾不利退至科布多是役也輕進中伏傅爾丹棄大軍先退至於大敗副將軍查弼納公巴遜參贊公達福等均死之甲戌命馬爾賽爲撫遠大將軍勅錫保固守察罕瘦爾岳鍾琪奏督兵進烏魯木齊八月己亥以鄂彌達爲青州將軍丙午移科布多兵駐察罕瘦爾己酉晉封錫保爲順承親王甲寅岳鍾琪奏兵至納隣河距烏魯木齊二日程探知賊遁大兵卽旋命從優議敘九月乙亥命康親王崇安前往軍管給備裝銀萬兩戊子以劉於義爲直隸總督沈廷玉爲直隸河道總督朱藻爲河東河道總督己巳皇后那拉氏崩册諡曰孝敬皇后冬十月丙午錢以塏乞休以魏廷珍爲禮部尙書準噶爾入寇克魯倫侵掠游牧親王丹津多爾濟額駙郡王策凌合兵擊之擒斬無算上嘉之各賜銀萬兩晉策凌爲親王十一月癸亥命順

承親王錫保爲靖邊大將軍降傅爾丹爲振武將軍降馬爾賽爲綏遠將軍命  
歲親王崇安攝撫遠大將軍乙丑以史貽直爲兵部尙書彭維新爲左都御史  
十二月庚寅朔日有食之己酉聖祖實錄聖訓告成甲寅以馬士傑署廣州將  
軍準泰署福州將軍丁巳給祭太廟是歲免直隸江南河南福建陝西湖南廣  
西甘肅等省九十三州縣衛災賦有差朝鮮琉球入貢

十年壬寅春正月癸亥孟春享太廟皇四子弘曆行禮壬午命鄂爾泰爲大學  
士甲申以軍前統領達爾濟爲建勳將軍駐兵白格爾二月以王朝恩爲直隸  
河道總督魏廷珍爲漕運總督己亥封鄂爾泰一等伯世襲庚子岳鍾琪奏準  
噶爾犯哈密遣總兵曹勳往援敗之賊由無克克嶺遁副將軍石雲倬坐不遮  
擊逮問癸丑以張廣泗爲西路副將軍劉世明參軍事三月丁丑大學士等疏  
劾岳鍾琪奏報不實情詞互異下部嚴議夏四月辛卯置貴州古州鎮清江鎮  
總兵各一員乙巳以海壽爲戶部尙書性桂爲刑部尙書降三等公岳鍾琪爲  
三等侯仍護大將軍丙午以張大有爲禮部尙書范時繹爲工部尙書乙卯詔

修雲南嵩明州尋甸州水利五月戊辰以武格爲揚武將軍劉世明副之閏五月甲辰恒親王胤祺薨諡曰溫子弘睦襲恒親王原誠親王胤祉卒於景山禁所賜銀五千兩照郡王例殯葬吏部尙書勵廷儀卒庚戌台灣北路西番滋事官兵討平之癸丑以李衛署刑部尙書六月丙辰以莽鵠立爲漢軍都統壬申高其倬奏雲南思茅土夷勾結元江夷人寇普洱郡城遣總兵董芳率兵勦之辛巳辦理軍機大臣議奏卹贈戰歿喀爾喀台吉策勒克輔國公其子密什克襲軍機大臣之設始於此秋七月丙戌馬喇免以武格爲工部尙書丁亥山東鉅野牛產瑞麟己丑賜顧八代子孫銀一萬兩丁酉命鄂爾泰經略軍務召岳鍾琪來京以劉於義爲陝西總督李衛爲直隸總督辛丑準噶爾入犯烏孫珠爾傅爾丹迎擊失利下大將軍錫保嚴敗狀以聞乙巳大學士蔣廷錫卒己酉以福敏協理大學士唐執玉兼理刑部尙書八月丙辰復恭親王之子海善員勒原銜庚午西藏邊外巴爾布國雅木葉楞庫庫穆三汗遣使進貢優勅答之壬申北路副將軍親王丹津多爾濟額駙親王策凌奏追擊準夷至額爾得尼

招殺賊萬餘賊向推河遁去甲申撥帑銀二百萬兩解赴北路軍前備賞九月  
乙酉朔諭擊準夷功加丹津多爾濟智勇名號加策凌超勇名號封其子車布  
登扎布爲輔國公餘升授有差以馬爾賽縱賊失機褫爵職處斬己酉削傅爾  
丹爵職冬十月壬戌停本年決囚削岳鍾琪爵職逮京交兵部拘禁十一月丙  
戌以常德爲靖邊左副將軍乙未封土魯番額敏和卓爲輔國公賜七世同居  
湖南沅江縣生員譙衿御書匾額十二月乙卯賜卹北路陣亡諸臣查弼納馬  
爾薩海蘭達福等有差侍郎係嘉淦有罪論死命在銀庫處行走乙丑治呂留  
良罪與呂葆中嚴鴻逵俱戮屍斬呂毅中沈在寬其孫發邊遠爲奴朱羽采等  
釋放丙寅武格以造言撤兵逮問辛巳禘祭太廟是歲免直隸江南山東湖南  
等省七十五州縣災賦有差丁戶二千五百四十一萬二千二百八十九永不  
加賦後滋生人丁九十三萬六千四百八十六田地八十九萬四千四百十六頃四  
十畝徵銀二千九百八十七萬二千三百三十二兩六錢茶三十四萬二千三  
百五十一引鹽課銀三百九十八萬八千八百五十一兩鑄錢六萬八千四百

三十六萬二千有奇朝鮮巴布爾國入貢

十一年癸丑春正月戊子命海望李衛察勘浙江海塘修范公隄壬辰頒直省書院膏火銀各千兩以高其倬爲兩江總督尹繼善爲雲貴總督庚子命鄂爾泰巡閱北路軍務丁未上謁陵二月壬子上見沿道安設水缸蓄水灑道上諭之曰蹕路所經雖有微塵何礙地方官當以牧養生民爲重若移奉上之心以撫百姓豈不善乎癸丑上還京丙辰以保明查爾泰伊勒慎俱爲滿洲都統己未上御經筵封皇二十四弟胤祕爲誠親王皇四子弘曆爲寶親王皇五子弘晝爲和親王貝勒弘春晉封秦郡王壬戌命彭維新協辦內閣以吳士玉爲禮部尙書涂天相爲左都御史夏四月壬子特賜任啟運翰林在阿哥書房行走癸丑賜陳倓等三百二十八人進士及第出身有差乙卯以嵇曾筠爲大學士仍管河督以劉於義爲吏部尙書涂天相爲刑部尙書張照爲左都御史己未徵舉博學鴻詞五月甲申高其倬奏普思苗人刁興國叛討平之命編修張若靄庶吉士鄂容安鄂倫俱在辦理軍機處行走乙未命額駙策凌爲靖邊左副

將軍常德副之塔爾岱爲靖邊右副將軍永福副之同成科布多續修會典成壬寅黑龍江將軍杜賚奏海島特門奇圖山等處綽敏六姓內附歲貢貂皮已酉誅前提督紀成斌六月戊午蘇祿國王臣母漢末母拉律林奏伊遠祖東王於明永樂年間來朝歸至山東德州病歿長子歸國嗣王次子安郡祿三子溫哈喇留守墳墓其子孫分爲安溫二姓歲領額設祭祀銀八兩請以其後裔爲奉祀生從之戊寅哈元生奏討平九股逆苗秋七月乙酉大學士陳元龍以年逾八旬乞休加太子太傅致仕李微以越職言事褫職裁湖南觀風整俗使戊子順承親王錫保削爵子熙良仍襲郡王以平郡王福彭爲定邊大將軍降親王丹津多爾濟爲郡王撤去勇號八月丁卯以顧琮爲直隸河道總督趙宏恩爲兩江總督高其倬爲江蘇巡撫己巳置順天府四路捕盜同知九月辛丑鄂爾奇革職查訊以慶復爲戶部尙書鄂長署步軍統領冬十月辛酉以扣婁爲蒙古都統忠達公馬禮善爲刑部尙書十一月甲辰命果毅公訥親在辦理軍機處行走十二月戊午詔曰前鄂彌達條奏台灣建城郝玉麟奏稱台灣茨竹

栽植可以成城台灣變亂率自内生賊匪無城可踞乃易盪平惟鹿耳門爲台郡門戶於此建築砲臺足資備禦栽植茨竹相爲藩籬其淡水等處砲臺並應建造以時增修己未以史貽直爲戶部尙書張照爲刑部尙書徐本爲左都御史壬戌以高斌爲江南河道總督丙子貽祭太廟是歲免直隸江蘇安徽江西山東等省二十九州縣衛災賦又免江蘇鹽場二十五引鹽課各有差朝鮮安南蘇祿入貢

十二年甲寅春正月辛丑平郡王福彭進馬五百匹解軍備用壬寅侍郎查克旦辦理車臣汗部落諸務得宜加尙書銜賜銀五千兩入官房地人口給還二月癸丑上御經筵己未晉封貝子胤祜爲貝勒乙丑命侍讀春山給事中李學裕册封安南國王壬申命額駙策凌總理前敵軍務癸酉元展成奏坡東坡西苗寨一百六十內附旌廣東興寧縣老民幸登連年一百二歲其子五人各七八十歲一門眉壽加賜上用緞一匹三月丁丑工部尙書范時繹免戊戌河南學政俞鴻圖以婪贓處斬其父侍郎俞兆晟褫職尹繼善奏勦平普思叛苗招



撫投誠人衆得旨凡事懈於垂成忽於既定勉之夏四月丁未湖廣容美土司田民如有罪革退改土歸流康親王崇安薨以伊叔巴爾圖襲爵封其子永恩爲貝勒庚午禁廣東象牙席並禁民間購用五月己卯施南宣撫司改設流官癸巳以李禧爲漢軍都統乙未以準噶爾使來停止進兵己亥命內務府總管來保前赴車臣汗部協同查克旦辦事六月丁未湖廣忠崗等十五土司改設流官秋七月癸巳命果親王胤禮經理達賴喇嘛駐藏並至直隸山西陝西四川閱兵詔西北二路用兵年久或乘此兵力直進賊境或遣使往彼諭以利害廷臣集議以聞康親王巴爾圖等一議進兵大學士張廷玉等一議遣使上乃宣示用兵始末從後議遣使八月丙午遣傅鼎阿克敦往準噶爾宣諭壬戌降貝子胤禕爲公泰郡王弘春降爲貝子九月甲申命侍郎呂耀曾卿德福往貴州宣諭苗蠻命雲南開爐鼓鑄冬十月丙午果親王胤禮疏言臣工條奏宜據實敷陳不當推拾塞責得旨所言甚是曉諭輪班條奏官知之丁未以鄂彌達署天津都統阿里袞爲青州將軍傅森爲杭州將軍戊午以郝玉麟爲浙閩總

督以三泰徐本俱協辦內閣事己巳景陵瑞芝生十一月壬申朔前直郡王胤禩卒命照貝子治喪封其子弘時爲鎮國公丙寅勅續修皇清文穎壬午特詔福建漳泉二府化其强悍勿再聚族械鬪戊子封理密親王子弘晄爲輔國公十二月癸丑朔勅廣西仍歸廣東總督兼轄丁巳以魏廷珍爲兵部尙書顧琮爲漕運總督朱藻爲直隸河道總督白鍾山爲河東河道總督高斌爲江南河道總督庚午禘祭太廟是歲免直隸安徽等省十四州縣災賦又直隸鹽場十四引鹽課各有差朝鮮琉球入貢

十三年乙卯春正月己丑以覺羅柏修爲盛京將軍那蘇圖爲黑龍江將軍赫星爲寧夏將軍二月己酉上御經筵庚戌以魏廷珍爲禮部尙書癸丑上謁陵己未還京甲子以巴泰協辦大學士三月丁巳上親耕藉田戊子詔曰地方編立保甲必須俯順輿情徐爲勸導若過於嚴急則善良受累矣爲政以得人爲要不得其人雖良法美意徒美觀聽於民無濟也夏四月乙巳聖祖文集刊成頒賜廷臣丁巳停止廣東開採閏四月丁酉準噶爾遣使臣納木喀賚表進貢

勅令定界己亥建先蠶壇於北郊五月戊申給三姓八旗兵丁餉銀丁巳以貴州古州台拱逆苗滋事命哈元生爲揚威將軍統領四省官兵討之甲子命果親王皇四子皇五子大學士鄂爾泰張廷玉等辦苗疆事務工部尙書巴泰褫職命刑部尙書張照副都御史德希壽稽勘苗疆事務丁卯哈元生奏勦辦逆苗黃平施秉悉平六月乙亥勅戶部清查各省耗羨癸未以查克且爲工部尙書甲申准土司由生員出身者一體應試辛卯減各省進獻方物呂宋國饑請糴許之丙申命董芳爲副將軍協勦苗匪秋七月乙卯鄂爾泰請辭伯爵大學士許之給假養病仍食俸署甘州提督劉世明以失察兵丁搶劫論斬丙辰命朱軾往勘浙江海塘辛酉以邁柱查郎阿爲大學士張廣泗爲湖廣總督八月己巳詔曰從前經理苗疆本爲乂安民生乃經理不善以致逆苗肆出勾結熟苗搶劫居民是以安民之心成虐民之政返之初心能勿愧乎所有貴州本年錢糧通行蠲免其被賊州縣蠲免三年以示撫綏球郵之意丁亥上不豫戊子上大漸宣旨傳位皇四子寶親王弘曆己丑上崩年五十八是歲十一月丁未

恭上尊諡曰敬天昌運建中表正文武英明寬仁信毅睿聖大孝至誠憲皇帝  
廟號世宗乾隆二年三月葬泰陵

論曰聖祖政尚寬仁世宗以嚴明繼之論者比於漢之文景獨孔懷之誼疑於  
未篤然淮南暴伉有自取之咎不盡出於文帝之寡恩也帝研求治道尤患下  
吏之疲困有近臣言州縣所入多宜釐剔斥之曰爾未爲州縣惡知州縣之難  
至哉言乎可謂知政要矣